

靖安縣志卷之十三

藝文志

宋

碑記

雙峯堂記

舒邦佐

予竊第歸厭舉子業平生纏繞肺腑欲以古書一澣之家近市囂耳聒心蕩一日窺後園古木環合桑柘蒙密平林高峯如竦如揖出沒隱見去城市不步武而得幽人隱士之勝築堂三間尾以一軒堂之中有二山闖以入開牖迎之晴則髻綰鬢結蒼翠玲瓏不黛而綠不櫛而勻雨則飛雲浮霧冥濛

靖安縣志

卷之十三

藝文

一

其間舒卷濃淡變化無常霽耶雨耶無不娛目堂名雙峯志其實也軒不壁而牕環修竹植名花竹簟紗厨藤牀石枕夏日虛閒清風颯至不減義皇上人名以北牕志其宜也面堂鑿兩池無活泉雨則溢名曰天澤池上有橋觀月尤宜新蟾弄影雲霄間摩挲烏藤牽挽繩牀或坐或倚少焉月色如水雪冷浸則恍若廣寒不覺人世也故以待月名之堂成終日倘佯坐則深文蹟義名章俊語相與爲莫逆起則煙霞吾朋徒林泉吾嘯傲花石吾娛嬉蓋未始一日不居或過予曰淵明之松菊彼仕者而思此時之不可仕也白公之石樓彼功名羸了奉身早退爲自適者也子於二者無有奚翫於此曰

不然退爲進基靜爲動主靜與退不錮夫心而一於動而進也則射利抵巇舐痔嘗糞亦恐不免何則誘乎外無以制乎內也若軒冕之念輕山林之意重則倘來富貴於我如浮雲而涖官行已必不肯少負名教故能成天下之大功名者每每於心在功名之外者得之予將植根本於斯也若夫出而爲雲乎爲雨乎爲鵬乎爲鸚乎則又聽造物者處之而已無適不可也客曰有是哉退而書之

雙溪岷瞻堂記

節錄

幸元龍

虎山之衷垂北有岷靖安幸元龍葬母其上而堂焉四時登矚觸物傷懷膏雨春濡南風薰阜時則動蓼莪鞠養之哀寒

靖安縣志

卷之十三

藝文

二

風淒淒草木黃落時則興霜露悽愴之感追昔俱存爲樂灑淚成血卽欲穿荆蘭之衣以承菽水之歡不可復得翹首歛歎念母不見惟見其壟耳母恩罔極喪紀有制制有盡而悲無窮雙林之山綿綿雙溪之水涓涓其所以寓我諸孤千古之恨乎

明

築土城記

訓導

董諮

正德辛未夏五月華林賊立寨馬腦崖離城二十里據險肆惡劫掠鄉村男婦逃避縣治蕩然勢日猖獗時承平日久民不知兵卒難捍禦秋八月左都御史應城陳公領敕總制至

省城乃選郡守李侯二守汪侯統兵守備茲土二侯督戰布
衣草屣持弓挾矢不愛軀命奮勇當鋒爲士卒先時邑城未
就居無定位或於火場依棲或依高山屯劄憲副吳公參將
趙公議曰保障不固人心渙散兵無所依戰無所據宜築鑿
之亟爲經營用克有濟於是設法處置刻期興作未期月門
禁敵樓亦皆完固而士卒得以養精蓄銳將帥得以運籌帷
幄敵至得以從容決勝而無驚惶失措之虞癸酉春二月十
九日元首就擒餘黨盡戮遠近人民扶老攜幼歡欣以歸文
武百司軍民俱快奏凱受賞謳歌踴躍莫不歸功於城池之
建爲弭盜安民之所由基卽方之李唐平淮蔡之捷不是過

靖安縣志

卷之十三

藝文

三

也諮躬歷其難目睹其詳書此以俟後之君子

築磚城記

訓導

吳 鎰

靖安南昌郡之屬邑也創自南唐迄於國朝仍溪山之便未
建城池至正德辛未馬腦賊變千戈搶攘懼無守備憲副吳
公太守李公邑宰萬公權築土城便立四門制甚率畧凡方
隅之辨阻險之設廣狹高卑之勢皆未暇講也迄今五十餘
年壬戌之秋趙公黃村來守茲土見土城卑薄捍禦不固急
欲改築惟時閩廣寇犯隣封聖天子申飭疆域都御史周公
巡按御史成公檄郡邑遍造磚城高廣堅厚而邑宰趙公適
奉行之以舉大衆動大事須合衆志始議出自富義繼更以

丁糧士民胥允爰號召遠邇經畧舊制闢黌宮之隘建城隍
祠於內徙南門於縣前以表居正之體遷東門於所止以明
震位之宜北門則接於河流西門則達於清湖石甕層樓險
固足恃城脚礪石下基四尺磚壘一丈三尺高一丈七尺濶
計八尺週圍五百丈有奇估值有常令民與諸匠作聽從其
便粟米棉麻之類皆以納值民無負逋工無曠缺雖用其力
而不告勞雖用其財而不告匱歡欣鼓舞趨事赴功肇基於
甲子之秋告成於乙丑之冬延袤百雉言言屹屹然金湯
之固大功告就舉酒落成屬記於館以垂不朽館曰夫建城
不難而不擾民爲難况靖安素稱瘠土非常之原黎民所懼
其始也人多難之乃今刻期而就迄有成功其能不自適於
鼓舞也哉傳曰以佚道使民雖勞不怨趙公之謂矣

尊美堂記

知縣 朱宗晦

予自爲浙西縫掖時與有志之士究論先聖爲治之道未嘗
不慨然興嘆暨拜天子寵命來牧茲土得以行其所可爲安
敢不竭忠誠以著學古入官之效署北舊有堂宇簷壁傾壞
予始修而飭之以爲燕處治事之所揭尊美二字以爲修己
之助邑有儒士進而言曰善哉令尹斯堂也靖安邑小而民
瘠令尹以五美存諸心吾屬其有瘳乎昔趙宋時曹豳爲簿
於茲後至宰輔人以袞繡名其堂名則美次然止於稱頌而

已於國家何補楊億爲令於茲構水木清華亭於邑治之東得曾南豐詩碑云雖爲千家縣正在清華間至今以爲名言景則美矣然止於適趣而已於政治何益孰若吾令尹尊五美之可尚也修己之學愛民之心具見於此予乃進生而語曰古之言治道之大且詳者無如孔子孔子歷述堯舜禹湯文武之政於魯論記者以答子張問政之日記於帝王之後然則爲政之要孰有大於此者乎吾與二宰判簿長史皆筮仕於此發軔去柅能不以五美服膺哉姑以斯堂論之因其舊而修飭庶幾不傷民財惠也可不費矣民少有勞或可無怨矣吾處是也期政平訟理得所欲矣而不爲貪吾臨於是

靖安縣志

卷之十三

藝文

五

務心平氣和信亦泰矣而不爲驕或進諸生討論治道或語吏胥推究事體或理訴牒審實獄情儼然以爲民望吾之威庶不猛歟若是則吾與僚佐不負斯堂之美矣後之來者有見於此智者尊之昧者反之苟縱其利而費繁勞其民而怨積欲而貪者或匪仁慢而驕者不克泰衣冠瞻視乏正大之威箠楚躁謬肆苛酷之猛政治其有不隳歟其或托溪山之美以曠懷覽風物之美而肆志則美其所美而非吾斯堂之美矣生再拜曰斯言也愷悌無窮之意也請記以爲斯堂鑒予以生之請頗有符予浙西縫掖之意遂書以置諸壁間使後之君子有以知予之心

植芳亭記

知縣 萬士賢

正德辛未冬十月太守李承勛別駕汪穎領兵勦賊寓於法藥寺植柏四株於法堂之前眾皆謂植非其時不活既而四柏挺生枝葉盛茂士大夫皆異之曰我侯之德有回春之力因名之曰李公柏作植芳亭於法堂之前非著異也以彰德也德至而氣亦至焉夫植物亦氣類之相感卽莫不感於盛德之氣德莫大於仁義一家仁則一國興仁一家讓則一國興讓今太守深潛純粹滿腔子皆仁矣發強剛毅滿腔子皆義矣太守以仁義存心故志之所至氣亦至焉以我之仁可以感在天生物之陽以我之義可以感在天利物之陰陰陽合濟無物不生是柏亦物類耳太守立志植之而和氣應之故不期活而自活不期萌而自萌不期盛而自盛是皆感召乎陰陽之氣而然者也奚可以植非其時而比論哉昔者寇公遺愛枯竹復生元奘西回樹梢轉向其潛孚斡旋之妙豈人所能測哉蓋氣機之相感者微矣今太守於隆冬之時植栢茂盛其亦可以因彼而識此也太守平寨已回郡城士民於栢不啻甘棠憩稅之思既建植芳亭以表之並記之以見不惟其物惟其人且不唯其人惟其德也

修儒學記

教諭 何 瑗

瑗一日講下諸生舒清輩進而請曰吾庠自昔興廢屢矣舊

皆草創而未稱也今茲廟貌森嚴門堂整飭而弟子侍先生
得以趨踰俎豆展報祀之禮泮奭優游談進修之業於其中
者皆縣尹劉公之力也已二十年於茲矣惜未有記以告來
者非吾庠之缺典乎敢請先生補之俾勒諸石庶劉公之功
不泯瑗聞而嘉之第愧不文敬辭他日諸生又請辭不獲按
志靖安始自南唐則學宮之建其來尙矣宋縣尹黃君宗諤
蓋嘗修之而燬於元季兵燹國朝洪武間衡公守敬正統間
金公文英景泰間張公羽相繼修之皆未臻乎美盛成化庚
子劉公至政通人和於學校尤加意乃掄材鳩工撤其舊而
新之壬寅大成殿成翼以兩廡廡左右折爲戟門乙巳明倫

靖安縣志

卷之十三

藝文

七

堂成翼以齋東曰進德西曰正心號舍後於進德廩庾後於
正心櫺星門舊爲木勿久也則易之以石學門舊惟兩楹弗
稱也則益之以十聖賢之位像享祀之祭器與夫饌堂厨庫
師儒廡宇無不修飭之其用材也堅美而久遠其規模也高
大而軒豁其工作也縝緻而完固無苟簡無浮侈焉嗟夫爲
政以人材爲先學校乃育才之地而實士君子立身行道之
根本尊崇致美不於其他而於學校若劉公者可謂知所先
務而不忘其本者矣諸生是舉蒙其功而不沒其功其亦忠
厚之至也劉公名芳字永錫陽江人

重建學宮記

御史

謝師啟人武昌

先是萬曆己卯余承乏浙闈以天之靈主上明聖得士倍疇昔迄今二十餘年浙士冠冕宇宙於是江右一時綰符者最盛余以探五老之竒客靖安靖安豫章屬邑也而巒序傾頽應令盡撤而一新之應令卽予己卯時所錄士也故學博張景星劉維德田萬方率諸生謁曰英俊處世如葭灰之在管也氣動則先應今天下人文以浙爲候而浙又以先生爲候先生以浙士造豫章無已而用其餘以豫章士報浙願以一言爲請予按邑志此庠創於成化庚子鄰法藥禪刹寺鉅麗甲城中而學宮故喧庠甚瓊殿紺宇下瞰宮牆梵唄之聲侈於絃誦博士所居不庇風雨弟子員環橋門而觀聽者或僦

靖安縣志

卷之十三

藝文

八

僧居以棲幾於暴士而市矣先是應令下車博士諸生縷縷言狀令業首肯居頃之融風大作寺盡燬合曰不有廢也吾何以興爲請於院司道府僉曰唯唯令捐俸爲諸生倡諸生爭先樂輸不旬日而致數百金於邑庭乃拓地闢址鳩工掄材擇邑簿朱國泰總領其事而聖殿則錢裕國舒必顯舒明臣舒顯才董之兩廡則漆光宸漆光照堇之廟門名宦鄉賢兩祠則趙希傑董之泮池櫺星門則陳應唐董之明倫堂之儒門則陳文學董之兩齋房則塗崇佑董之廣文舍則湯有光熊經士龔曰賓董之經始於甲辰之十一月竣工於乙巳之七月凡八閱月而告成事禮殿巍巍環以兩廡講堂翼翼

繚以周垣饌厨庾廩戟門齋舍咸秩秩有序丹碧堊赭飛空
蔽日煌煌焉奕奕焉庶幾素王宮矣於是應令以八月吉行
釋菜之禮博士諸生咸在予矍然曰善哉令是舉也無負學
矣夫學宮蕪則子衿之口興闕宮成則采芹之頌起齊宣以
稷下蜚聲文翁以蜀郡流譽夫庠以儲賢育才扶轂世宙威
儀人倫者也詎不重與天厭異教爰降之罰今一旦新之以
振二百餘年中廢之業而有其成功可不謂表端影直卓然
不詭於正者耶吾何以益多士雖然吾習爾靖舊矣往先大
父司馬公守豫章士民頌義不忘趙公文同以靖產守吾郡
民到於今稱之靖雖僻狹而其入鯁亮樸茂無奇袤之好亦

靖安縣志

卷之十三

藝文

九

足稱也夫士際休明之代誦周孔微言而事其大夫之賢者
有不相助而成者乎出則王臣處則聖修斤斤奉其師說出
入不倍所聞是惟諸大夫建學造士之意浸假工篆刻繡鞶
悅謀利千祿而已豈稱士哉不甯惟是在宋中葉簡公世傑
舒公邦佐並以制科高第來蒞吾蒲政尚愷悌不設科條氓
類至今有口碑而惇史紀循良必以二公稱首非爾靖先哲
乎哉魯人之陟岱嶽必首東山吳人之涉滄溟必先震澤其
觀法近則其用力專矣願多士勗之不則况伯律姑蘇之政
炳炳麟麟與天壤共敝彼豈嘗呻吟佔畢抒青揆藻若今文
士然耶夫士業屏首受書委質則廷至程功效能無由媿美

前人則斯庠奚取焉非應令所以承天之休及爾多士樂輸意也余不習謾語且素習靖故談靖爲悉如曰夫夫也舍洙泗濂閩而媿媿靖士卑之無甚高論哉則吾誠耄矣則吾誠耄矣令名汝稼字于難浙之台州府臨海縣人

委源洞記

徐世溥

邑之極西有洞曰委源人跡所不至也舒叔厚遭亂僅存一身今子孫蕃衍至數萬賴入此洞以免也其初火粒兩斷有神日以苦菜啖之得活故其歲時祀祖必以苦菜舞儼以報洞神之賜自厥祖出後洞無人跡又若干年矣洞口石壁夾峙初不容人必側身而入故名摩肚崖信乎肚與崖相摩也

靖安縣志

卷之十三

藝文

十

過崖有湫深碧畝餘橫當崖口緣山右繞避湫履苔不百步有流水九十九曲一曲一石宛若人置以承跳者須奮勢而越稍怯卽墮水矣高峯障天喬木暗林難計甲子一望可三十里惟聞鶻啼鸛效異鳥呼吟麝麇來往猿狖千百爲羣如村落楔社窅然非復人境洵自古緇黃所不能開草竊所無可據也有山牛山羊豪豬猩猩樹有熊跡泥有虎印目之所遇殆非大荒四經曾載者頃清流治客聞其饒有古木結茅洞口欲就薪炭之便而石隘水紆漢枝唐榦終無一束能出崖口者萬聖功思設計墾之天閉萬古五丁無施竟不能與山鬼耆獠爭尺寸云其處東至縣治西至甯州南至奉新北

至武甯皆百餘里土地平廣別一山川自非摩肚崖者久作人間世矣

按舊志載此篇闕名府志入於雜誌采自雨稗新漚此書據榆墩集序知爲徐巨源所作也

國朝

林侯德政去思碑

舒 彥

夫天下易予人以所悅而難予人以所思赫赫之功炫耀一時相與悅之相與忘之耳惟德之入民也以漸而政之惠民也有加而無已舒徐浸漬若無意於治者之所爲而靖變安民耕桑禮樂有條不紊未嘗期人之思之也而自不能不思

靖安縣志

卷之十三

藝文

十一

則於我林侯今日之去任而可見矣侯初涖茲土羽檄交馳鴻飛靡定侯以單騎造壘投戈歸命而萑苻不復有嘯聚昔人所以思渤海也今也集中澤矣如之何弗思處兵燹之餘丁壯半爲燐火田疇已滿荆榛痛定者幾不聊生思復者尚多觀望侯則分別力墾多方招徠昔人所以思鄭州也今也邀豁免矣如之何勿思兵戈之後水旱頻仍徒守懸磬之室莫慰啼號之苦侯則繪圖請蠲而請賑昔人所以思監門也今也遂生育矣如之何勿思至於兩京稅儲難以頃刻緩也侯則撫字心勞催科政拙昔人所以思陽城也今也稱寬平矣如之何勿思至於桁楊桎梏國憲之所必不免也不惟乳

虎之是懲亦且蒲鞭之足矜昔人所以思江州也今也慶咸中矣如之何勿思潛消窺伺之姦而壯遠邇之鎮則莫如雉堞昔人所以思晉陽也今也增培壘矣如之何勿思崇獎風俗之原而作橫經之氣則莫如修葺聖宮昔人所以思文翁也今也歌實枚矣如之何勿思六年之間校士者四單寒積學均被甄拔而文風丕振昔人所以思聖俞也今也多獲雋矣如之何勿思靖民得以蒙業而安者孰非侯之賜也哉方思適館授餐少報恩勤乃遽憶蓴鱸飄然解組我心能不悲乎侯長於詩歌樂府精於春秋四傳欲廣瑞雀樓之家學而紹楊羅李朱四先生之傳昔人所以思香山洛社之耆英也

靖安縣志

卷之十三

藝文

十二

又如之何勿思思之所積勞於擬議擬人於倫伊何人哉衮衣章甫惠我無私我侯有焉欲永思存必有所寄因相與謀構祠俎豆無旣庶幾勿翦勿伐勿敗勿拜之思世世弗緩云爾侯諱鍾號松濤閩之南平人也

義學田記

知縣 高克藩

記曰古之教者家有塾黨有庠國有學王制曰小學在公宮南之左大學在郊塾庠序學者施教之地也小學大學者立教之法也後世京畿郡縣皆立學而小大不並設塾庠序學不兼舉蓋地與法統於一而未嘗分也明洪武定制國子學州縣學之外詔有司更置社學延師儒以教民間子弟今之

義學卽古之家塾黨庠小學之遺制也義學所以佐縣學之不逮蓋博士弟子員旣已設儒師而董課之矣而義學則徧及於民間之後秀使小子皆有造也義學之利民與常平義社諸倉同功蓋常平諸倉所以行補助備凶荒使民之貧者□有藉以養也而義學之設則使民之貧者皆有藉以教也靖邑舊有社學四所歲久湮沒不可復理予奉

命泣茲土首以課文講學爲諸生勸邑之人旣喁喁然而向風矣又慮義學之不設無以廣其途而厚其蓄也乃於城之北隅得圯屋一所因其舊而新之更於兩旁各構廊房三間繚以垣牆飾以墍茨捐俸買負郭之田三十畝歲取其入以

靖安縣志

卷之十三

藝文

十三

佐膏火之資擇士之能文而有行誼者爲之師聚民之貧而不能學者肄業其中壬申之冬請於中丞馬公勒諸貞珉田畝租券一一載刻以志不忘學之師三年而一更學之徒兩季而一報又設簿三本一藏縣一藏學一藏義學師以備考查防其侵沒昔韓昌黎刺潮州置鄉校聘潮士趙德爲之師文行興起紫陽朱子知南康軍奏復白鹿書院捐俸葺之日給貧生肄業予德薄不敢妄擬先賢顧一念惓惓育才之誠姑以其力之所能爲先爲之倡俾後之踵事者擴充而光大之且以使窮陬僻壤之民咸自奮於家塾黨庠之義觀感作興其於化民成俗之道或不無少補云

重修城隍廟記

高克藩

治之東城隍廟隸焉余始至之日祇謁廟貌肅然起敬瞻其棟宇龍蛇蝕於風雨瓦石落於荆榛心甚惕之倉卒未遑就理涖邑之三年治具麓舉百廢可興乃謀於邑之人煥而新之金碧輝煌儼然知神道之尊焉功既成將記其事因以諗於神曰邑四境吏與神分治之者也凡民生之利病士風之興替惟正之供輸訟獄之質成胥役之作奸盜賊之伏莽更皆得而治之至陰陽之愆伏雨暘之恒若民生之凋瘵人心之善惡土物之休旺鬼蜮之邪慝神皆得而治之吏所不能治者以其半聽之神神所不能司者以其半待之吏是吏與

靖安縣志

卷之十三

藝文

十四

神各奉厥職以分治此土也靖邑褊小土瘠民貧士知禮義訟獄罕有胥役寥寥無奸可摘盜賊屏息維神之賜惟是催科撫字政拙心勞幸更邀福於神以匡吏之不逮以報朝廷之萬一年來陰陽調和雨暘時若凋瘵漸起人心漸淳癘疾不降物不夭札是神奉職甚明可以上報

天子而吏亦蒙其餘佑也顧吏奉職惟謹早作夜思其有不盡心於民不加禮於士溢於額徵偏於聽斷懈於覺察疎於隄防者皆官方之慝也神實得而糾之亦願神更竦其精靈勤其視聽補其缺畧俾時和而年豐民安而物阜戶有可封之俗鄉無夜吠之犬則是神與吏交相與有成也神其聽之

以慰吏之惓惓語既竣因屏息而爲之記

後樂亭記

高克藩

廳事之後退食之所名曰君子堂其右曰尊美堂其西曰西園西園之後曰慎思堂中爲明德堂東爲東園園舊主簿廨堂曰袞繡爲曹豳立也堂左有柳亭有曲沼堂右有廢亭予撤而新之顏曰後樂別爲牆以間之爲門以通之繡谷桃源羅列若屏障蒼翠可掬花木之屬有桃有柳有棗有榴有古樟一冬青一棟一橙一有紫荆二桂樹二有老柏四新柏二有芙蓉有臘梅有荼蘼修篁繞徑雜木成林編竹爲籬刈草爲圃方幅咫尺之區隱有城市山林之況可眺可吟可飲可

靖安縣志

卷之十三

藝文

十五

射可乘風可坐月可望積雪可覽雲霞變幻之氣蓋遊目騁懷時行物生之致於此乎備之矣余考邑乘昔者黃宗諤令茲土於後圃剏製錦堂有百花幽谷二亭楊億治尉圃得曾南豐幽谷亭詩碑用其語構水木清華亭物換星移三亭之舊址無從過而問焉大率名亭之意皆寓山水之樂爲耳目遊觀之資而予易之以後樂者蓋不以山水之樂爲樂而以一邑之樂爲樂亦不以一邑之樂爲樂而以天下之樂爲樂以君子爲基以慎思爲棟以明德爲楹以尊美爲宇以袞繡製錦幽谷百花水木清華爲金碧藻績基壤棟朽楹宇傾頹而徒以金碧藻績爲工雖樂弗樂也基固棟堅楹宇完整而

後加之金碧藻績雖不樂樂也後之者緩之也慎之也使人
寓目警心而得之也此則予名亭之意也是爲記

重建學署碑

高克藩

天下郡縣莫不有學學莫不有官官莫不有署所以重師儒
崇教化也傳世久遠廢興不一學宮圯壞有司有過而問焉
者至學署傾頽則視如秦越甚至僦民居棲祠舍署不屬官
官不屬學師儒之體不尊欲望教化之興行其可得乎予初
蒞靖卽切切然慮之會庚午冬瀘溪李君秉鐸茲土首以建
署爲請且以工費不繼爲憂余應之曰世有不可解之事二
儒者口誦孔孟輒能痛闢佛老衣冠之輩百倍於緇衲之流

靖安縣志

卷之十三

藝文

十六

顧仙宮梵剎當頽敗零落雖費累千萬不難一旦振舉至於
先聖宮牆師儒舍宇鞠爲茂草況也永嘆反不如二氏之鼓
動衆心咄嗟立就此邪正消長之機有識者所爲深憂也更
可怪者天下之司牧者衆矣名與實違令與好左禁之愈厲
犯之愈工其才其智可以無所不爲獨於興利革弊修廢舉
墜之實政則諉於功令之嚴寂然不敢舉動噫是何其能蹈
千仞之險而不能履平地也予抱此意久矣凡邑之宜舉而
不克舉者且將一一勉而爲之豈於學署而顧忽諸爰是謀
之紳士無不欣然樂從躍然共應經始於辛未三月之杪竣
工於癸酉五月之初堂寢若干間左右廊屋若干間計工若

干日費銀若干兩落成之日李君以倡率之義歸功於予予曰大凡舉一事必期事之成財不必其出於己也力不必其用於獨也不成則咎不敢諉也成則功不敢尸也是役也捐資殫力經營布置惟司鐸任其勞至於督工趨事則諸生舒大儒錢錡舒士俊舒卷錢鈞涂彩雯舒宜舒斯辛舒士傑舒果等與有力焉其樂義好善聚腋成裘眾紳士之德也余力微祿薄解贈無幾得從諸君子後遙觀厥成余幸矣余何功之有遂書其事以告後之君子

文昌宮碑

李日彰

學宮之內有文昌帝君昔人謂周宣王中興之佐張仲是也

靖安縣志

卷之十三

藝文

十七

張仲孝友上帝嘉其德命掌文學默相多士士因之以奮飛故特建一宮於學旁塑其像而春秋俎豆之庚午冬予秉鐸雙溪見其傾圯惻然心傷遂言於邑侯高邑侯剡溪名賢也素有斯念聞而是之乃爲之序乃輸之囊一時在位者暨諸紳士互相鼓舞勉率其力而爭先恐後於時集木於時鳩工於時督繩削墨一切棟梁榱角與檐楹戶牖之屬小者易之以大朽者易之以堅曲者枯者易之以直且良曾日月之未幾而輪奐落成風雨烏鼠攸去攸除何其遒也必有以也人曰居高而呼聞之者眾眾則易易則遒勢也然雙溪兵燹之餘屢逢饑饉百務維艱令其地者自非大德長才簿書錢穀

之間掌且鞅寐且假朝夕不遑何有於是哉噫嘻是宮之成也帝君之光也人士之慶也邑侯高之功山高而水長也予不佞謬膺一鐸亦得附驥逃曠職之罪而不勝寵榮也爰作歌曰維我帝君佑我人文虎變豹變炳霞蔚雲乘時進仕其克有勲明禋休享萬年苾芬

重修文廟禮樂器碑

教諭 胡朝極

禮樂百年而後興此魯兩生之說也古之帝王治定成功必制禮作樂以昭一代功德之隆而於宗廟尤兢兢焉至尼山一席春秋祭享其禮樂與當世之諸侯王等自漢歷晉唐而宋而元明雖代有損益而威儀綴兆所奏者韶濩大武所陳

靖安縣志

卷之十三

藝文

十八

者俎豆馨香非後世綿蕞虛儀昭德象功所得而參者也我朝繼體右文禮樂興作不必百年而天下之庠序謹其教學校育其才彬彬乎其三代禮樂之治乎而文廟之推崇尤所特尊伏讀

御製孔廟碑文闕里檜賦玉音宏麗睿思英敏具見崇儒重道之意凡宇內之儒臣山陬之小邑皆當踴躍整飭於禮儀樂舞之中而不得以倉卒從事者也靖安爲江右之西偏隸屬南昌民風淳土習樸然而文廟之籩豆不備樂器無存大爲茲邑缺典邑侯毛公甫下車以是爲首重今春祭時進諸生詢厥廢弛之故對曰自甲寅乙卯以來山寇蹂躪者數年矣

室廬凋毀卽文廟幾爲茂草遑問禮樂器乎公愀然者久之顧朝極曰禮樂國之大典頽敝若此誰之責也吾當捐資力辦獨肩其事兩師第董率之勿替云爾自今二月始請頒禮樂志一部選補樂舞生六十四名鼓鐘笙管沿書列名沿名制器齎資遣工同樂舞之老成者或走數百里外買備琴瑟鐘簾之屬或入深山窮谷買石爲磬復敦請豫章文學之黃生者居明倫堂教習徐制徐演公一日一臨或日再臨婉諭樂舞諸生執事者當顧名循實毋始銳而終惰毋日玩而月愒去城遠者公食之衣不備者公衣之遍製合式諸服七閱月買備器用供資食物計所費不啻百金廉吏之資囊竭矣

靖安縣志

卷之十三

藝文

十九

旦夕之勤勞至矣公以中州名解成進士從詞林出宰茲土文章政事兩膺高譽於是山林之叟扶杖來觀鄰封裹糧而至鼓鐘作於堂上干羽舞於兩階祭之日主祭者凝乎其思肅乎其容婉而不迫敬而有制恍然若聖人之親臨也極等幸獲從大君子後與斯盛美敢不虔恭以將以祈昭格乎自子達辰隣封山藪觀者殆數千人無不抵掌嘆曰聖人之制禮樂也賢人之祭聖人也有如是哉各咨嗟感興而去所謂禮樂作於廟中聲教達於境外無言之感動於國家之治化非小補也第公之操守若冰愛民如子興禮樂廣教化育賢才

聖天子一旦甄拔卓異爲天下循吏風公必首應斯舉後之繼興者其亦知公竭心思殫資力綢繆無已之經理乎良法難再執事易弛遂謀諸衆生相與勒石紀盛庶將來在廟者觀禮思敬觀樂思和三千八百五音十二律濟濟雍雍而加飭焉則公之美意與斯廟並垂不朽云

曾學師去思碑

知縣 唐崇勳

邑之中民統於令與丞尉士統於學固各有攸司矣然民視乎士士視乎師勢又未始不相因也余曩嘗友教通山欲以服乎士者及乎民使風俗丕變以無負厥職邇奉

命宰靖有民社之責而化民成俗之意又欲以淑乎士者望

靖安縣志

卷之十三

藝文

二十

之師冀得有鴻儒焉爲彼都人士之楷模夙志庶幾其慰乎比與祥翁先生接乃大快曰先生眞其人哉先生靈鍾盱水大儒文定公之裔理學之傳實世其業語默動靜一以聖賢爲歸聆其緒論雖飲醇坐風不足喻其粹也其爲文沈酣於六經子史而出之以高華典則識者固知其得於涵養之素而非徒事科舉業者所能也以壬午冬司鐸於靖靖人士來謁者諄諄以道義爲誨或與之盱衡古今辨晰疑義卒未嘗一語及外事靖民之黠者嘗訐生於學以洩其私先生曰是不可長輒還其牘溫言以相遣而事之是非又必向生私質之其非者固諄切以冀其改悔卽是者亦必勗以容物不校

之量居靖數載不必矯枉過正而俗亦變故遊先生之門者賢者悅其德不賢者服其化所以厚風俗成人才先生之功居多余嘗考之於古邵康節先生之滿懷都是春可以方先生之養胡敬齋之經義治事可以方先生之教其他固無足以類先生先生老而嗜學尤好讀易一日有感於時止則止之義浩然有歸與之想固留不獲上其事於大吏既允所請諸生告予曰誠令範也可令其久而不彰乎予愧不文不能表彰其萬一姑以予之所見而知者竊舉其梗概壽之貞珉俾後來有所矜式云

黃茅嶺茶庵置田碑

舒慕芬

靖安縣志

卷之十三

藝文

二十一

環靖皆山而西北山尤勝距城六十里地名黃茅山者高接青天俯臨古港不殊蜀道焉山爲礫坑忠夏諸里要衝石磴盤折廿餘里無居民荒茅刮面叢篠牽衣往來者惟聞嘯猿啼鳥聲嶺趾舊有茶亭小庵數椽住僧施茶極便行役緣無食贍僧遂致終廢而破壁頽垣徒存於荒烟蔓草而已邑侯唐公數過其地惻然咨詢謀所以復之而難其人會有楚僧心閒者欲來興復是庵持簿乞序於侯侯卽欣然曰是余志也遂走筆爲引付僧且治齋集邑紳士之好善者而告之曰施茶必貴於延僧延僧不可無所以飯僧抑飯僧而不務垂諸久遠則今日能飯僧而僧留安保異日之不能飯僧而僧

不去是則不可以無田侯於是捐俸倡率諸紳士隨力醵金爲助其得銀若干兩諭鄉約某董其事用價若干就庵之左石置田七畝有竒以便耕種復給僧銀使治田具又用價買地一區山一片爲種茶探薪之地更慮其取於田者有限而修葺庵亭日用零雜之費有未給也復以所餘之銀採置租石俾僧歲取其稅以佐不逮議成侯不鄙芬之不文而命芬記其始末鐫之於石以誌不朽噫今日之通都巨邑爲津梁叢林之請者在在不乏而爲長令者不過署名簿首曰地方官某樂助若干大抵虛聲爲倡塗民耳目者耳卽或有量給多寡者亦聊塞請乞而其後遂置不復問欲求如侯之慨然

靖安縣志

卷之十三

藝文

二十二

題引募眾捐俸置產而且慮遠思深委曲備至者烏可得哉吾知異日者靖人士往來山間長途渴乏憩亭啜茗方且頌侯之功德於不衰已

重修學宮碑

知縣

李作仁

朝廷以百里之地委之於令令所司者豈惟是簿書錢穀已哉將民生之休戚風俗之淳漓於是乎繫焉雖然難言之矣重催科以副功令不無心勞政拙之憂聽習氣以爲遷移不無江河日下之勢念及於此有不遑甯處者矣然以二者計之其難易又有間焉四民之中各有恒業卽各出其力以自食自非災祲頻仍豈遂至於化儻失所撫綏或可無憾至於

人心之邪正彝教之崇替一有不謹其害甚於水旱盜賊之患顧可以泛常視乎則黨庠術序之地秀者之所升樸者之所視人心之賴以正彝教之賴以明莫斯爲要矣余自辛卯之春承乏於靖首謁文廟瞻顧堂廡棟撓梁摧而大成殿尤爲風日所暴烏鼠所竄怒然憂之如負隱痛而勢弗違也凡閱三稔諸事麓理邑之廢而待興者將次第以舉乃進學博與諸人士而謀之曰余計老氏之宮毘盧之刹於彝倫風教無當也緇衣黃冠之徒刻行苦志尚能結構連雲焜煌金碧以示尊崇吾徒南面而役萬靈權力百倍使絃歌俎豆之地頽廢若此而莫之省憂謂風俗何謂教化何僉曰唯唯於是

靖安縣志

卷之十三

藝文

二十三

分貧吏之俸以爲倡維時動於義而樂勸其事者比比焉乃以癸巳仲秋經始甲午孟夏落成凡十閱月而事竣仍其舊而葺之者若聖廟若兩廡撤其故而新之者若啟聖祠若明倫堂若泮池材擇其良工惟其密於其成也而落之乃進章縫而告之曰學所以養士學新矣士因而新其德師因而新其教若晏同叔延范希文故事靖人士當必有歐陽富孔之倫出焉其所以正人心而端風俗豈逾於此乎余不佞與有榮光矣至於紆青紫侈纍若以震耀閭里之耳目非所語於修學勸興之意也余何庸贅

金孟庚捐田碑

李作仁

古所稱吏治莫大於敦倫紀勵風俗予蒞靖兩載校士課農嘗三致意焉而於巖居谷處之士行誼有關名教者思延訪而旦暮遇之每以簿書鞅掌未逮爲憾適邑諸生呈舉金孟庚事余詳其始終不禁爲之景仰致敬也孟庚本徽州休甯籍其父行生於順治戊子卜隱於靖安之南源華家山相山之宜築樓屋三間偃仰棲止置田貳拾畝有奇以爲生養計又置山三畝地六分種植竹木以爲膏火之需自是行生終老於斯卽葬於所居華山之陽有子三人遵父遺命回籍完娶承祧而孟庚獨奉祖母遺像仍祀山樓終廬父墓春露秋霜孺慕之誠歷六十五年如一日也嗣是孟庚年九十餘自

靖安縣志

卷之十三

藝文

二十四

慮景逼桑榆恐田糧在民戶難免侵佔之失田失則墳亦泯沒爰將其所置田若干共租若干造冊稟縣請給印照內以租若干送學爲黌宮積置書籍惠造後學以租若干捐除佃人爲香火墳墓祭掃費是皆孟庚詣縣所陳之謀畫議成而孟庚死矣嗟乎孟庚以故家遺胄捐妻子棄功名棲異域破衲敝屣樂善好施而其所孜孜於懷者惟是篤念天親助興文教洵克全乎人道之大矣未經聞見猶將訪求碩德著潛德幽光俾後人過其里者憑而弔之以勵風教况孟庚深懷遠想重其托於予不爲之計長遠是田雖存於學宮久且不知其田之所自出又孰計墓之爲有無則孟庚之田與墓前

慮其沒於民後并慮其沒於官而孟庚將不傳矣伊誰之咎也哉故予前以孝義可風表其廬今復述其梗槩紀其行事貞之石以誌不朽孟庚亦可自慰乎至於積置書籍惠造來學果能守而行之擴而充之令讀書者慨然想念孟庚之前事此又異日司鐸者之責也予將有厚望焉

華家山義書樓記

舒 庚

山人金石庵廬墓靖安南源華家山悲憤自誓終身不娶年踰八十自念身死之後無可託者將其田租山木樓屋園林呈縣立案內將租穀若干捐送儒學購買經史載在明倫堂石刻此其惠造一邑後學既溥而永尤念近處而私淑者不

靖安縣志

卷之十三

藝文

二十五

可無所垂以宏其教思也於是積烝嘗賦稅葺廬修塚外之所存者更爲廣置書籍架樓以藏之使後之藏修游息於此者賴以擴其見聞焉因名其樓曰義書樓嗚呼此其意深且遠矣先正有言詩書之道廢人惟見利而不知有義欲使風淪俗美惟在上者操學術以轉移之易爲力耳今山入身披破綻之褐粟僅升斗之儲不過捐衣食之贏餘孜孜以購書勵俗爲念視世之矜佈施貪福利刻巍峩之像豢無益之僧憎前經而不知者是山人之罪人也若夫樓名摘星閣表玳瑁非不高且麗也然止於貯歌舞壯遊觀卽清人雅士之志亦不在此况山人哉山人行修於身德薰於人慮陶淑於一

時者有限又以茲樓所藏者牖人明聰益人神智俾詩書之澤滋潤於無窮此其維世立教之意詎可忘哉詎可負哉後之登斯樓者啟篋笥披卷帙交相勸勉居稽賞晰講習復以求夫微言大義之所存甯非風教之一助乎則斯樓者雖未足語於二酉之富四庫之藏實爲義塾之所取資也因記數語以告後賢

况伯律先生祠堂碑

知縣 黃天球

余吳人也公之政績在吳先君子嘗亟稱公守蘇時廉明剛正人皆呼爲况青天自余爲兒童時固已心識之矣及長補蘇庠諸生吳中故老徃往能道公遺事乃知公爲江右靖安

靖安縣志

卷之十三

藝文

二十六

人夫重其人則并重其地且思一識其子孫余旣登第康熙六十一年除靖安令私喜獲符所願而問公之子孫則未免式微未嘗不爲之太息也因公事過公故里入其家祠肅拜遺像神采端凝恍見古人風範而春秋未及官祭余甚惜焉今天子御極褒崇往哲

詔天下建忠義祠合祀其邑先賢余旣爲公置主於公祠而復擇官地一區令其子孫立專祠於

文廟四南隅春秋仲丁別行特祭表公之尤異於諸賢祠旣成請余爲之記夫公沒距今越三百餘年始克建廟崇祀固宜有記而公之生平則尤余所樂道者公諱鍾字伯律初以

禮部尙書呂震薦授儀制司主事遷郎中宣德五年用尙書蹇義胡濙薦擢知蘇州府賜璽書假便宜乘傳之任當是時蘇州賦役繁重豪猾舞文爲姦利最號難治公初視事吏環立請判文書佯不省左右顧問惟吏所欲行止吏大喜謂太守闇易欺益滋弊通判趙忱百方凌侮公唯唯不與校忽一日合僚吏言有敕未宣可宣之敕許僚屬不法徑自拿問僚吏皆流汗股栗因升堂召吏之尤桀黠者詰之曰前某事宜行若止我某事宜止若強我罪當死命裸之俾隸有力者四人舁舞文吏擲空中立斃六人陳尸於市一府大震其後人無敢欺者於是蠲煩苛立條教事不便民者立上書言之悉

靖安縣志

卷之十三

藝文

二十七

報可先後奏免官糧七十餘萬石復流民三萬六千六百七十戶明冤枉軍民人一千八百餘名免民買抽分船隻米一十五萬一千八百石革冗役圩長九千餘名減遞年包荒糧一十四萬九千五百石公爲政務鋤豪強植良弱興利除弊不遺餘力時則廬陵周文襄公忱撫吳憫蘇松賦重與公悉心計畫力甦民困凡文襄所行善政公協成之者居多先是公丁繼母艱去民詣闕乞畱者二千餘人乃詔奪情起復還治蘇後秩滿當遷部民二萬餘人復走訴巡按御史張文昌乞再任詔晉二秩如民請竟卒於官吏民聚哭爲立祠其得民心如此嗚呼公可謂無媿古名臣矣余竊謂公之爲政也

有似鄭子產子產政多出於猛而孔子稱之曰惠又曰古之遺愛蓋子產因俗爲治鄭俗淫侈非威克厥愛不足以鋤頑梗而植良善觀其水懦火烈之喻以爲民狎而玩者多死民望而畏者鮮死則知其肅之以法裁之以義正所以致之於生而善成其惠愛也公之先猛後寬視子產何多讓焉余嘗閱蘇郡志及明史稿載公始末甚悉而靖邑志頗畧其始政則於公寬猛交濟之用猷爲未備也故因祠記而補列之俾後之人有所考焉抑公祠之建也掘地得殘碣有橫書建昌况氏妙五字蓋存其半而軼其半矣靖之置縣自南唐其初本建昌地也意祠基卽公先世遺址而妙某云者其氏名耶

靖安縣志

卷之十三

藝文

二十八

建祠而適當其地則亦有數存乎其間并記之以見茲祠之不偶然也祠成於雍正二年秋至六年秋始克爲之記云

鑿磔洞記

熊銓

縣之以雙溪稱也以南北兩溪環於縣之左右北溪之源濫觴於磔坑由磔坑而上幾與南溪接者曰磔洞崇山萬疊一水中流崩湍激浪迴旋於磊砢巨石之間殆與柳州所記鉗鉏潭無異然地多竹木民受其利亦間遭其害蓋出運之際水漩石擊目眩手顫一觸而隕則沈於千仞之淵此如陰平墜師冒竒險以貪利者殆相類焉居民苦之久矣張君某慷慨有爲人也愀然念曰利之所在其能使人不取乎取利而

隕其生則何利之有且吾不爲鄉人謀利獨不爲鄉人惜生乎乃上下谿谷左右經畫忽顧而喜曰石可斲也石斲而水平矣於是自捐貲若干一簞之出又募費若干鳩集石工鑿險開塞不數月而功成曩之岌然角立者並爲坦途而民始有利之樂無生之憂矣余以爲常人之智憚於創舉而易於附和此溪自數千百年來民之貪其利而罹於害者不知凡幾而不知所以去之獨張君倡義剗削若五丁之開蜀道其爲人謀利之功猶小其好生之志則大也若張君者所謂才足以濟其善者歟故爲之記

重修文昌宮記

漆顯畧

靖安縣志

卷之十三

藝文

二十九

文昌宮舊在學宮之內歲久棟朽榱頽鞠爲茂草神像僅安於明倫堂之右偏春秋祭祀草率成禮弗肅也康熙壬寅黃侯璞齋以錫山名進士宰靖始下車涖學問文昌宮安在左右以久圯對侯曰嘻是神佐治文教烏可勿飭吾將徐圖之越雍正乙巳百廢具興爰修祀典謀所以奉文昌而煥其棟宇是秋與邑紳士降觀卜吉擇地於義學之後捐俸建宮堂祀文昌樓祀奎宿黜堊雕繪罔不周密巍然赫然神得攸棲矣考諸古文昌降於越嶠卽詩所云張仲孝友是也上帝以其孝友命司文籍讀書之士莫不知其爲儒林權衡今侯建厥宮而以妥以侑其見而慶者謂神爲文章司命可乞靈於

是也其見而禱者謂神職掌桂籍可邀福於是也吾謂黃侯崇祀文昌之心與建宮於學後之意固不僅以科名詞藻爲重也侯以生人不朽之業立德爲先凡士之所以爲學與師之所以爲教其必兢兢德行以爲科名詞藻之根柢人或昧其本末神必判其輕重惟文昌牖世覺民百行是錄炯然於冥冥中視德之善惡以行其黜陟今像貌巍巍位於絃誦之所使先生弟子朝夕對越立心制行矜式惟嚴欲求對文昌而無歉必先問屋漏而無慚果德契於冥自神濬其心靈而畀之福祉所謂感無不應者其在斯與其在斯與故侯不患神不祐吾文詞科舉第患士之崇文昌者徒效六祝之辭而

靖安縣志

卷之十三

藝文

三十

不求之身心性命間也其爲靖邑正人心興賢才之意不深且遠哉季冬宮落成邑士屬予言以記其事予欲學者體黃侯之志而以德行自勵也於是敬謹而爲之記

會買義學田兼重修學舍記

知縣 王 端

古者國有學黨有庠術有序家有塾其事皆仰承於上而不待舉於下至後世書院之設則往往皆前賢過化之地後人慨慕而追思之披莽榛翦荆棘以登堂而考業焉是亦建學之意而舉自下者洪惟我

世宗皇帝文治翔洽薄海嚮風屢詔天下郡縣俾立社學窮山邃谷之間比屋絃誦教澤之敷靡遠不居逮今

上御極之元年復於郡縣學之外詔各省皆立書院優給帑金以資膏火則書院又振興於上而不自於下作育之隆視古有加焉夫宣上德意以廣勵人才有司之責也體盛世作人之雅化相與興學而立教亦士大夫之義也然則義學者又以補社學書院之遺也靖於豫章爲人文之地而舊無所爲義學者至康熙三十年剡溪高先生克藩以名進士宰靖下車之始雅意甄陶始擇縣中公廡建爲義學又捐學田二十九畝八分八釐計每歲所入不足具苜蓿不能特請一師姑擇邑老宿之聚徒受俸者繫名義學以示風勵焉歷任諸公沿爲故事至前任黃先生天球特建奎樓於學舍之後堂

靖安縣志

卷之十三

藝文

三十一

宇加闢而館穀未增也則又寄其任於儒學涂君接任張與孫見學舍傾圮無從肄業因收田租入官以備公費比余之承乏茲土也適靖有馬租田五十餘畝先是各憲以田租虛設着令變價而孫任實墊解銀四十三兩存之以爲公產其後孫君故其嗣請鬻之以歸旅櫬遂有欲攘而私之者於時邑紳士等不忍忘故令之遺愛而不爲償又不欲公產之歸於一姓也輒捐金買田蒙憲批歸義學由是合前所存義田通計八十四畝四分七釐每歲可得租若干余深嘉諸君子之用意而猶惜學舍之圯乃設法捐修增所未備前廳左右新構兩廡廡各三間奎樓左右舊各有廊房二間勢且傾頽

復重修新之兼葺其正中之廳與樓自門徂堂煥然一新約計前後木料工食之費凡百有餘金規畫出納一委諸義民舒帝簡至是而規模始大備焉計自今田租可以贍師長學舍可以容生徒不支帑項而爲興賢育才之一助斯亦舉之自下而足以佐上之教化者其於

朝廷設書院立社學之意亦不爲無當而又益以成前任高君之盛美諸君子之倡是舉也可不謂好義急公者乎昔文翁治蜀首興學校韓退之刺潮始聘趙德爲師而潮人知學余誠未足以幾此抑亦藉諸君子之義舉而簡師儒選英俊以肄業其間則亦古鄉塾之遺制也因記其原委泐諸石以

靖安縣志

卷之十三

藝文

三十二

示後云

育嬰堂藍田會記

涂基

育嬰堂舊制也而藍田會則縣尉瀛海崔君新倡立也人始生爲嬰無不育於父母者然不幸爲窮困之孕或遺棄之孤則嬰不能育而賴仁政以救其生此育嬰堂所由設也夫堂以育嬰而育嬰之會名藍田意偏於女者何居蓋男之待育者少女之待育者多由溺女者多也靖邑溺女之習其始貧戶爲之謂難於撫養婚嫁其後雖大戶亦徃徃爲之以爲溺女旋可生男陷於一偏之見嬰兒轉死溝壑不知凡幾夫虎狼猶知有父子以人之靈而天性血屬立斃其命曾虎狼之

不若遏生機絕人道害可勝言哉舊雖建有育嬰堂名存實亡未聞有挽頹波而拯胥溺者崔君以癸亥歲任靖尉始聞而憫焉嘆曰吾何忍坐視而不爲之所深心籌畫者數載乃謀於衆斷於衷值余以公事晉接揖余言曰吾思除俗之溺女者當無患其勿除也余曰幸甚旣復却顧曰將毋訾議謂非吾所得行者余曰庸有之雖然濟人利物隨分自盡行仁之方雖途人可試也奚慮乎君乃慨然身任刊布勸文以動其天良而賢者知感君曰未也愚民之情難猝化異言不入者不如使之有所畏於是責成保甲稽查違令者以法繩之而頑者怵君曰未也口惠而實不至奚以使之從也輕於是

靖安縣志

卷之十三

藝文

三十三

有報溺女者捐俸給銀米衣裙而貧有所資不數年全活女嬰二千有餘口向之不樂育女者且拜崔君之德而羞殘忍矣邑中仗義好施者見事之有效俗之可移也一倡百和各出資共勸厥舉置田收租以贍久遠因名曰藍田會其憫惻之深衷哀矜之至意若出於一人之心謂非風教一轉關與人情可與樂成難與圖始有實心不患無實政今崔君除溺女之事人所憚難行者獨勵精定志矢願勤而求成銳固宜其令行而禁止法肅而民歡也從此構堂增產惠益溥而益厚豈獨育女哉無告之男咸可資也嬰無不育廣天地好生之德於無窮則藍田會者正育嬰堂所賴以不朽者矣其功

豈不大哉余樂記之願後之君子相爲始終不可泄視而或弛也

藍田會記

典史 崔宏道

藍田會者何予念溺女之習思有以易之而邑中同志者諒予懷聯斯會爲慈幼計也予初至靖聞溺女事卽駭然驚以爲偶然已而常然予痛心疾首恨習俗之相沿而恬不爲怪也夫男女等也屬毛離裏胡忍異視乃女甫生而卽斃之干天和傷王化實甚每晉接紳士相與嘆息久之願得有維挽其間者予自愧位卑德薄空言奚補旣復自念一命之士苟存心愛物於人必有所濟匹夫而化鄉人又聞其語矣况屢

靖安縣志

卷之十三

藝文

三十四

奉各憲之告戒兼紳士之同情事無不可行者則圖所以挽之或曰勸諭之勸之而具文以視奈何或曰法禁之禁之而巧遁於法外奈何或曰捐給以贍之贍之而不繼又奈何蓋予輾轉於懷而不能以自甯者數載於茲矣歲己巳更諮於眾乃獲於慮曰其並行之可乎爰刊發勸戒文數萬張條令百餘張郊城內外傳諭殆遍以開導於始又立廣生冊分給保長令其按月稽查民間產女悉行註冊有不育者廉以告而繩之法以懲戒於後其極貧者捐給小衣二件錢一百米一斗俾臨盆後稍免饑寒以惠周其急文告甫開而投名請領者無虛日月二年來活女嬰二千有餘口領給錢米者三

百有餘家予既幸民情之可挽而猶慮接踵而行者之難也乃建議聯會以圖久遠予捐百金以倡其始而邑紳士舒工生等共捐金四百金以襄其成名曰藍田會蓋亦作善降祥之意也遂相與同心協力置田四十餘畝每年收租若十石善後之法倣照社倉之例擇殷實士民經理交倉聽本衙給發貧戶其開銷數目於年終詳報以杜侵漁嗚呼靖雖僻壤爲保二十有八爲戶三萬有零生女之數歲不下數千其願養者十之一二溺斃者已十之八九其埋怨於冥漠中者夫安知其凡幾耶今賴諸紳士好行其德羣然相應而不違予亦藉以少慰其哀憫之懷若謂移易之效生養之功而侈言

靖安縣志

卷之十三

藝文

三十五

之則予固位卑德薄夫何敢夫何敢茲舉賢士名氏勒諸貞珉並將樂捐銀數逐一詳載以垂永久嗣此廣積田產俾生成之澤百倍於今日是所望於後之君子

重修縣大堂記

知縣

馮渠

夫縣之有堂也聽斷於斯飲射讀法於斯而上以宣君恩下以化民俗更莫不於斯然則堂之爲地亦重矣以時修葺無或傾頽此固處官事如家事者之應爾也其傳舍視之可乎靖邑自南唐改場爲縣衙署始建前明正德間扈於兵燹嘉靖元年從而新之迄今幾二百年守土者迭更而堂已垂圯矣余於丁卯春移官之靖顧是堂卽思有以修葺之

而涖任以來催科撫字與夫簿書期會之繁鹿鹿未就也今歲邑紳士咸願醵資從事來請於余余轉請之上憲旋奉允行乃鳩工庀材八月興工九月落成於是乎有輪奐之觀焉夫事難於圖厥始亦難於保厥終守土者知今日興作之勞而爲未雨綢繆之計則永久可垂豈復有前此傾頽之患乎顧堂公堂也事公事也昔鍾離意爲堂邑令出俸錢作屋民齎茆竹或持材木爭赴趨作不日而成猶市屋耳今斯堂也諸紳士踴躍赴公一若自爲築室計而不辭蓋其尊君親上之心蓄於中斯好義急公之舉見諸事非然者其肯身任若此耶此與堂邑之民何如也余不敏踈於治術然夙

靖安縣志

卷之十三

藝文

三十六

夜兢兢竊嘗以教養是務所望吾民共敦孝弟忠信之行遠囂凌詬誶之風而登斯堂也於飲射讀法而外跡罕至焉則士爲修士民爲良民於以成仁讓之俗以永沐

聖朝休養生息之恩豈不休哉是役也成其美者二尹司徒宜溧水人監斯工者縣尉崔宏道大興人會計出入以終其事者則邑紳士涂尙忠舒親生錢景福舒泮暨縣民舒帝簡也例得并書

東門外沿城路記

縣丞

司徒宜

靖安縣城可三里爲門四環城有路路五六尺各有差路外有城河其寬狹視路亦各有差南西北三門由門而橋而左

右市肆悉坦直無阻碍因亦可久惟東門內則東向出門下石級迺沿城北走不數武仍東向歷石級升橋曲屈欹側不耐人意又道通省會往來車馬不絕城河較他處復寬而深是以易傾卸乙丑秋七月余下車路已半卸卽欲爲募修計第視事伊始方悉力於漕政未遑及丙寅春可矣乃夏四月北津橋燬於火農將輟耕恒山梁公屬予偕紳士大斂費刻期復其舊路又不可兼也仲冬一日余署邑篆將節廉俸葺之會丁卯春捐修東南北城垣各十數丈力不能繼尋亦謝縣事乃復已嗣是天益淫雨路坍卸尤甚城河水且及城門行人更以病涉爲嗟月之仲夏士民羣相議曰是必買石成

靖安縣志

卷之十三

藝文

三十七

隄一勞而永逸也請之余余曰善乃以言弁簿首募金充其費橋之南長百一十五尺深六尺外築以石中實以土勢屹屹然門至橋廣十五尺中用石覆土上濶二尺餘免行者陷泥塗橋之北長白餘尺行人少石不能徧輦土補其缺較舊增一二尺不等於是歲之十月一日始作以戊辰之十一月成功得捐貲以兩計者將八十頗足償所出在事者旣公而勤樂輸者更義且勇于亦藉是以酬素願安吾民乎雖然古今來安民之政不以封域大小異并不僅在土木之次第修舉已也靖邑居深山中其層巒疊嶂丫牙而角立者天築之城也其南北二河西與馮水修水分流而東入安義者天鑿

之池也民生其間更數十百年目不睹兵戈之擾地雖小亦儼然奧區矣歐陽永叔曰所謂羅浮天台衡岳廬阜洞庭之廣三峽之險號爲東南奇偉秀絕者乃在乎下州小邑僻陋之邦夫既有奇偉秀絕之名勝雖下州小邑尚得而陋之耶靖安風氣渾樸所恃地方長吏誠求保赤無時不以已饑已渴之念貫徹於五鄉二十八都之中務令家給人足俗美風淳獄訟衰息而後已夫然後靖安之命名乃不虛焉至若城池橋路之繕修猶其小焉者也韓昌黎曰丞之職所以貳令於一邑無所不當問今賢宰旣已肩其勞余可不少効贊襄之能哉故於城路之修爲備記之以塞董事諸君子之請云

靖安縣志

卷之十三

藝文

三十八

橫板橋記

司徒宜

桃源西有白水洞水經鶴嶺再折而東南至馬岡爲橫板溪棠棣新興二都孔道焉其溪上下游俱狹而高至橫板獨濶且極卑下兩岸陡峭數十尺秋冬褰裳過者並苦之春夏水漲時勿復問向嘗設木橋雷雨動輒廢去苦頻修頻圯乙丑秋余以公事院於此急有倡建石橋意會費浩繁未果歲戊辰再至遙望石橋橫亘溪中如虹落澗心訝焉適桃源漆生學福來謁曰此吾伯兄之志而嫂氏之所成也兄在時目擊此間被溺者數人將命工師建橋旋賈志以逝嫂氏每念及卽潛然泣曰吾夫子抱此志吾弗克代終異日何以相見地

下乃出曩所備資獲少半復節用鬻簪珥益之費乃無缺自丙寅五月迄丁卯八月工始竣其橋濶幾許長幾許高幾許計費金以百者四請記其實以昭來許余謂古聖王爲舟楫以濟不通惟橋亦然利均莫大焉然乘船危從橋安似橋較舟楫利尤普今此橋易木爲石一勞永固遊其上者如履康莊其利不益宏乎而稱未亡人者實慷慨獨力奏厥功以完其夫未完之志其賢且才也更何如哉學福伯兄太學生學祿也其配姓舒氏國學元鴻女克著節操撫二遺孤其泳其泗年尙少並記之以觀其後焉

重修靖安縣學碑

署知縣 朱 堂

靖安縣志

卷之十三

藝文

三十九

皇上龍飛之十有六年歲辛未夏五月余來視靖篆初下車謁

文廟見大成木坊正中黌門東西兩廡名宦鄉賢兩祠頽敗朽蠹歲將弗支急欲修整然民事紛積方將銳意經理以此未暇卜吉迄壬申春二月選匠掄材整摧剝以堅完飭漫漶以丹堊月餘告竣前此風雨所侵榛莽所翳者亦足煥彩而壯觀矣至若重建改造大作輪奐端有俟於後來其時指授布置協謀勸事者教諭吳紘縣佐司徒宜司訓劉錫爵縣尉劉三傑也樂致私緡以贊成者闔邑紳士涂壘涂光範舒親生舒照錢天成舒書漆裕舒怡萬士琮等例得備書

重建文廟碑

知縣 李 紀

聖人之化與國家之聲教爲遠邇學校之制與人心之淑慝爲污隆是故學宮蕪則子衿之刺興泮宮作則采芹之頌起建學親師之義其有關於治化人材之本也顧不重哉我朝崇儒重道文教覃敷

先師典禮備極尊崇內而京畿外而郡邑山陬僻壤之區莫不建學立廟以育才俊所以資化源而崇教本也靖安豫章屬邑啟自南唐學宮之建其來尚矣宋縣尹黃君宗諤蓋嘗修之而毀於元季兵燹明衡公守敬金公文英暨張公羽劉公芳先後修葺歲久傾圮

靖安縣志

卷之十三

藝文

四十

國朝康熙三十八年高公克藩再建又五十三年李公作仁再修嗣後守其土者亦時修葺大都因陋就簡未符定制無以仰稱

聖人尊嚴之居庚辰冬予奉

簡命泣茲土謁廟之日目擊宮殿傾危慨然久之考其星野維斗所值覽其地勢左三台而右雙峯文筆峙於前繡谷殿於後雙水映帶於其間正在清華間矣昔人有言曰其山嵯峨其人磊落而英多意必有倜儻奇拔之士生於其間足以佐國家而大謀猷者乃溯其前代不乏人而數百年來文章德業每不克方駕前修豈士之不振歟抑地氣猶有待而充

歟明年春會紳士進謁首議此舉又以工鉅費繁猝難肩任爰分廉俸以爲之倡未幾而輸將者咸彙聚焉因詳請各憲臺之命與學博慎擇邑之能任事者以董其役庀材鳩工始於辛巳季春六日首營大成殿基取榱桷而金碧輝煌之廟貌一新前爲兩廡以妥先賢先儒之崇祀者外樹大成門其制廣視殿陛高殺之大成門左爲名宦祠右爲鄉賢祠春秋釋奠後得一例分獻門以南鑿地爲池規其半仿古泮宮之制濬得清泉與古井水合流不竭不溢此造化之淵蘊與道爲謀而特爲茲沼發源以表瑞於膠庠爲雙水人文之慶也予因歌詩以記其盛同官紳士皆屬而和之南爲戟門最前

靖安縣志

卷之十三

藝文

四十一

起屏牆及東西闕門孔道中闢過宮牆者煥然改觀矣增建奎閣於左移明倫堂於後建崇聖祠於北五王四配而外兩廡從祀如制起學廡於東偏燕坐有席庖湑有舍繚以周垣規模大備斯蓋靖邑人心嚮道踴躍爭先乃能成此千餘年未有之盛事也今夫閱運會而常新者聖人之道在天閱連會而更新者聖人之道在人天心之常昭卽人心之不已士生際

盛時沐浴清化建學親師之義旣已感奮於中斯廟治之新文化之隆也嚮道之誠士風之盛也自茲新其德業煥牛斗之光華應川岳之望氣蕙蘅其品圭璧其行雲漢其章彝鼎

其績又何難駕前哲而經明行修爲

國家儲有用之材夫豈徒誇輪奐之美廩餼之豐而已哉是役也董其事者舒泮舒鼎涂光簧舒克品徐黼漆裕舒一清舒怡涂履平舒馮例得備書若紳衿耆舊樂輸姓氏則固勒於碑陰云

舒雙峯後裔修泮池記

李紀

泮池舊爲舒雙峯所浚閱數百年之久僅存瓦礫榛蕪而已辛巳春經始

文廟而其後有人旣捐私橐復不憚勞以董其役初議仍舊址而疏濬之余旣因方位之未正而又以泮不及泉爲慮乃

靖安縣志

卷之十三

藝文

四十二

迤東數十武以治畚插未幾而泉灑灑其來會矣噫異哉是豈雙峯之靈默有以相之而聖人之道固若是其淵源不息也耶時則淤塞旣通工之輦石而來者或平池廣塲或臨流結砌四圍繞以巨欄架以石梁一鑑澄清可俯而卽也深廣視舊制有加而華美過之說者謂鬢序萃人文之秀得泮池清盈則山色水光上下相映而貞元之洩於多士者愈久愈昌焉舒氏此舉實嗣雙峯遺烈而毅然成之雙峯以名進士參衡州軍功業文章昭垂史冊而培植學校創立義莊至今猶班班可考也後之子孫奮跡於膠庠馳驅於王路者有駸駸日上之勢宜其繼雙峯之志以爲志述雙峯之事以爲事

修復之舉一仍其舊而三泉鬻沸則又前乎此者所未有也以是啟貞元之運而占人文之瑞夫復何疑傳曰莫爲之前雖美弗彰莫爲之後雖盛弗傳余於泮池之成嘉舒氏之急公而益嘆雙峯之流風勿替也是爲記

修兩廡記

李紀

自漢高帝以太牢祀孔子於闕里而釋奠之禮行唐高祖始詔立廟太宗始命守令主祭後世因之而羣弟子之祭則自漢安帝始我

朝

歷聖崇儒重道既尊

靖安縣志

卷之十三

藝文

四十三

先師而廟祀之凡先賢先儒之有功聖學者例得陪祀兩廡兩廡者與廟廷並重遇有剝落卽應擴而新之以符體制余洎靖興復廟工紳士舒際元際昌際盛等能承乃母涂氏之志毅然以兩廡爲己任捐金六百募工市材建東西廡十有四楹深廣視昔有加而金碧輝煌睪然在望足與殿廷相輝映焉昔范富歐陽諸公條議天下事首及

文廟從祀之典所以崇正學而勵名節也後之人觀瞻有自以激發其希賢希聖之心則飾廟貌以興教化所繫顧不重哉今舒君捐金集事以妥神靈以光祀典尚矣果能率邑人士咸汲汲焉以崇正學勵名節爲首務助執事教化之不逮

則又余之所厚望焉若涂氏能明大義成厥善舉是巾幗中之表表足爲末俗勸者也涂氏二尹舒元鴻之室人子際元行將筮仕

聖朝際昌蚤貢成均際盛爲國子生善人有後信夫故并記之

墁石墀記

李紀

闕里之制於大成殿外起露臺設階級迤邐而南則戟門也左右環拱者兩廡也中爲天墀春秋釋奠於斯陳舞於斯登降拜跪於斯鉅典煌煌猶仍土階茅茨之舊可乎度爲式觀垂久計是非石墁不爲功國子生余國俊善士也凡有利於

靖安縣志

卷之十三

藝文

四十四

桑梓者輒毅然先之廟工之役余旣與邑人士協力同心次第具舉惟天墀未墁尚無稱美備之觀余生不吝數百金肩任其勞召工鞭石計日落成堅緻整齊洵足以式觀而垂久矣且夫入聖人之門者由墀而階而陞乃升堂焉今則翼翼然紆餘平坦步亦步趨亦趨周中規折中矩釋奠以時陳舞就列登降拜跪展禮有地其有功於聖門豈淺鮮哉噫是役也而可通於道矣始基之弗壞可與圖厥終余生充是義而益力於學爲希賢希聖之階毋徒拘方域之見也可若云福善美報則是新浮屠老子之宮者之習聞也余無取焉余生勉之

修闕門屏牆記

李紀

櫺星以象文也戟門以象武也外眾門而東西列者惟闕門殿以妥聖靈也廡以妥先賢先儒也環堵而致竦敬者惟屏牆有其舉莫或廢也靖邑

文廟年久就圯荆榛在戶薜荔緣牆棟折椽崩一繩焉縛垣頽壁敗百堵難興舉目蒼涼其何以稱聖入尊嚴之居啟此邦文明之化也乎余奉

命承乏茲土初下車卽有修復之役又得諸紳士戮力共勸內而宮殿外而門廡已壯輪奐之觀矣惟闕門未闢屏牆未起猶有功虧一簣之慨太學生舒翼能繼父取仁志以任此

靖安縣志

卷之十三

藝文

四十五

舉庀乃材鳩乃工經之營之掾之度之不期月而聖域宏開矣循其牆遊其門者皆肅然起敬舉廢之功爲足稱焉揚子云倚孔子之牆誦莊韓之書則引諸門乎舒生學孔子之學者也引車而過將不墮其昭昭冥冥之修其不致見麾於孔子也明矣夫豈宮牆外望徒歎不得其門而入也歟爰泚筆而爲之記以示勗云

重修縣署記

李紀

昔叔孫氏所館必葺其牆屋古人居止不苟如是况以嚮明出治之區爲衣冠瞻仰之所更當隨時補葺以壯規模非徒以蔽風雨而已也乃後之視官廨爲傳舍者聽其瓦解椽崩

莫爲繕修行復不戒從者致多蕩毀噫何古今人之不相及耶余涖靖修舉廢墜悉出清俸鳩工於署前起屏牆復漢唐郡縣罍罍之體東西對峙圍以木柵榜曰志切興釐心懷撫字左右建申明瘴惡亭二大門三楹檐俯而卑無以式觀撤而新之增飾飛甍高其閤闔規制軒敞望若岑樓仍舊額而丹牖之儀門內戒石木牌仍用南豐詩意表曰正在清華間廳事俗皆曰大堂余取尙書義顏曰顧畏民岳題二聯於柱兩廊吏廡八隸役班房二皆垂朽修復之內堂幕廳東西庫庖溷之所棟桷欹腐者易之牆垣頽塌者築之壁之剝落者圻以粉瓦縫之參差者承以簞較舊制已煥然一新矣若其

靖安縣志

卷之十三

藝文

四十六

亭臺池沼蘼木葱蒨非不足以賞心而娛目余奉

命守茲土方將勤求治理圖報涓埃簿書鞅掌亦恐日不暇給矣又何敢寄情邱壑重勞土木之並興耶工旣竣余因之益愾然動念矣夫署公署也懸魚冷况固所凜凜士之遊吾門者果能絕干謁之私歟民之來吾庭者果能化囂凌之氣歟署以外之負郭依村聚族而居者果能共慶盈甯毋致失所歟余雖不及古人得免爲饒寬所誚幸矣後之官斯土者亦將有感於斯文

四門内外路記

李紀

周官之制九月除道農事畢而土工興如砥如矢無道弗不

治之患禮經涂九軌環涂七軌野涂五軌視國門廣狹爲等
差我
朝法古成憲著爲令典而於道路繕修尤汲汲焉凡有守土
之責者當仰體

國家愛民之善政爲綢繆補葺之謀豈得諉諸力有不逮而
已哉靖邑環山帶水城可三里爲門四內外有路爲省西府
州邑往來之衝輪蹄絡繹路久不治石盡崩坼以致高如陟
屺低若澤陂每遇積雨成渠不堪投足行旅苦之夫此邦人
士勇於爲義豈其道里所經嶽巖磈礫漠不關心歟抑費繁
力絀未克協心平治歟是殆守土者無以倡之耳余蒞政之

靖安縣志

卷之十三

藝文

四十七

明年節廉俸所入爲士民勸而慕義急公者皆後先謹應伐
石鳩工削平窪缺墁砌堅緻一律整齊易巖疆而成坦道夫
且中通溝遂宣洩積霑舉向之褰裳病涉者悉忻然履道如
夷矣噫此邦肯穀於以見懿德之好有同心能助余力之不
逮俾後人得坐享其逸其利濟不大且久耶子輿氏云義人
之正路也今日者士皆崇實學以正其趨民各務恒業以戒
其惰不入於歧不納於邪蹶蹶周道共興由義之忠是則余
之所厚望也若以道路之繕修已慶康莊謂足爲報最之具
是淺視乎爲政矣則吾豈敢路旣成嘉此邦之好義故樂得
而記之

修城記

李紀

城垣爲一方保障審圖在建置之初易曰王公設險以守其國有土者自不敢以戴鼇屨躑躅不前也矧我朝整飭疆域首重城郭

詔有司以時修舉例得請發

帑金其有官民捐建者獎異有差凡所以鞏固金湯衛我居民者意且深也靖自南唐開縣環山爲郭無所謂雁字馬跡者至明正德間華林寇發懼無守備副使吳公一貫與守令李萬諸公始令民築土城嘉靖間縣尹趙公輔舉舊制而恢大之辨方正位更築磚城萬厯間鄭公煦再建

靖安縣志

卷之十三

藝文

四十八

國朝康熙雍正年間任公嘉瑞高公克藩黃公天球皆先後修葺或派丁糧或出富義大都民自爲謀而官則代爲經理者也乾隆辛巳夏淫雨灌注四門內外崩卸四十四丈有奇時有進民修之議者余則曰城郭不治守土之憂也烏忍重勞吾民哉履勘繪圖條議以上皆報可遂捐廉四百餘金以復斯役不期月而屹然在望矣層樓將圯更撤而新之顏其上東曰紫陽西曰德勝南曰文明北曰挹繡文筆曬袍諸峯蜿蜒而磅礴迴溪象湖諸水清盈而映帶粉堞百雉烟火萬家不誠巖邑中一大觀也哉雖然城所以衛民而衛民之政又守土者之當講求者也嚴保甲以申守望之義戒游惰以

清盜賊之源令發於上嚮應於下士橫經而農秉耒以養以
教官與民且其慶昇平於

盛世也斯鞏固金湯以符設險守國之旨若輸金以邀懋賞
則非余之所敢計也爰誌其畧以備參攷云爾

塘埠義渡記

知縣 李 紀

聞之滹沱徒涉盧溝車渡無鞭石伐木之勞而往來稱便者
水使然也若涉大川利用舟楫招招印友望洋不驚固與輿
梁徒杠之政所當共爲修舉者也塘埠處雙溪之衝橫木以
通其窮舊爲水冲易以石工未竣而復圯爾車爾徒擔者荷
者嘗以及溺是懼卽有操舟驚渡者如列子所云利供百口

靖安縣志

卷之十三

藝文

四十九

無益於民欲持久而利涉烏乎得歟邑之好義者造舟爲梁
募夫掌之復釀金聯會置田有差以租穀之所入爲歲修之
費爲舟子之糧源源滋息裨益無窮洵可持久而利涉矣不
且與輿梁徒杠之政並垂不朽也哉雖然存心利物之舉類
足風世而經理不得其人以利民者爲自利計日朘月削亦
恐垂成而敗是又望於董理者之精白乃心持斯會於勿替
也聊弁數語以塞吏員高三章等之請尙其勉爲善人可也

縣治內外修葺記

李 紀

縣治內外均關政治不小也歲辛未夏五余署靖篆其在署
外者惟堂廡粗完固堂下清華亭則久圯兩旁胥吏屋宇風

雨無障蓋大門三楹棟且撓門外屏牆逼於門木欄亦未建
內則袞繡堂三間僅存故址及舊額常平倉五十餘座並朽
蠹不可支且夫蒞官者日當事其事詎可從久暫起見哉余
目擊諸廢墜不敢怠厥功爰設方計先建清華亭以
天語警心目次俾胥吏貯案牘各有所次繕大門得免鄭僑
慮次拓屏牆於旌善瘴惡二亭外規模既宏敞民望之心更
肅然東西設木欄各顏其上曰新民曰保赤官箴亦揭於眾
耳目間矣至起袞繡堂祀 三聖鎮倉廩於東北倉廩擘畫
移建於西東非曰作內署屏翰也實爲積貯計長久耳嗚呼
事關政治苟弗克勤則不敬莫大焉奚止曠乃官歟因次其

靖安縣志

卷之十三

藝文

五十

始末爲之記

敬聖會記

舒泮

敬聖會爲異日補葺文廟計也靖學舊無公費故殿廡門牆
或稍有損壞久則風雨剝蝕遂至傾圮此固因任者不得辭
其咎抑亦補葺之無資耳李侯以西蜀名賢出宰靖邑下車
之始卽捐廉倡修逾年金碧交輝固已擴千百年來未有之
宏模矣乃監從前之失并謀善後之方復捐清俸拾金爲倡
交泮生息以爲異日補葺之資噫侯之爲文廟計誠深且遠
也惟是泮以垂暮之年恐負寄托之心因語同事曰我輩經
營拮据殿臺取其高磚石取其厚木料取其堅工作取其密

原以計久長也我侯先得我心之所同尤當敬體而增益之并聯一會顏曰敬聖庶今甲明乙遞相經理責有攸歸所賴後之與斯會者矢公矢慎毋侵蝕以飽私囊毋懈弛以廢盛舉斯補葺有資而巍峩之廟貌常新我侯未雨綢繆之心亦昭垂於萬世矣與會者舒泮徐黼舒鼎涂光簧舒克品漆裕舒一清涂履平舒怡舒馮故并書之勒石於壁以備稽考焉

青雲樓記

何 瑗

學校亘古所重而當今尤加重焉有司當務莫先於此邑庠之興其來尙矣縣治向以風淳事簡舊無城郭故學宮得以面諸山而領秀氣當衆流而接清籟千形萬狀次第疊出舉

靖安縣志

卷之十三

藝文

五十一

日可備也邇年來地方多事干戈旁午築城捍固外接不通如前之雅致若缺焉承平之後宗主憲副李公以謂賢路貴亨通雲衢自廣闢乃令知縣萬士賢鑿去其城而通達之侯承厥命於壬申孟冬九日甃石以圈其門命匠掄材以建樓繪飾丹堊輪焉奐焉成於季冬十有七日也遂匾其上曰青雲樓蓋以諸士子養育鬢宮廣居居之大道行之正位立之他日掇巍科領高薦棟清廟柱朝堂居於要地者望之巍然如青雲之在上故曰青雲得路其謂是歟今斯樓旣置遠望千里誦讀之暇登遊於茲其景物可以動乎中風光可以觸乎外神清氣爽心曠神怡自得之趣悠然而生是亦斯樓之

資也予於遊觀焉有得又於諸生焉有賴故不佞於是乎書

重修靖安縣學記

知縣 馬廷燮

學者學爲人而已矣人既賦天理以生具五常之德任五倫之重聖人者人倫之宗也其所以憲章刪述而力行於身前垂訓於天下萬世亦祇爲天生蒸民立修道之教復性盡倫以蘄各踐其形耳故三代盛時比戶可封實由於君子小人皆知學道凡所以學爲人者重以周也自周秦之季王道熄經籍災選舉僞仕學分而士不知學民不興行彝倫攸斃兩漢英主汲汲於孝弟力田之中舉賢良方正之士作民司牧以教以養而人之所以爲人者不至終失降至六代隋唐詞靖安縣志

卷之十三

藝文

五十二

章之習盛而根柢之教衰風俗偷矣趙宋眞儒輩出聖人之籍昭如日星

本朝因之表彰彌善凡郡邑莫不有學以廟祀

孔子及歷代聖人之徒推崇至矣禮制備矣討論詳矣是不待記而明而其所以繼往聖開來學以牖民覺世期復其天性之良以各盡人倫之職者則猶是三代聖王之治而先師孔子之心也然則殿庭之制必崇奐而後可以肅觀感禮樂之器必燦備而後可以資考肄庶幾其奉祀也虔而講貫也精繹遺經而窺絕學明明德以作新民皆於是基之效焉廷燮懵學寡識

簡命爲靖安邑長於茲七年竊嘆其風俗淳古人心向學良由我

國家崇儒重道治化之隆上媿三代雖小邑可覘大同是則王道之成實基於學校之興學校之興不繫乎學爲文者之眾而繫乎學爲人者之專也人倫之至宗師也哉爰謹於歲豐民樂之時捐薄俸勸修

聖廟士民之秀且饒者同心竭力庀材鳩工共輸金若干分董其事而合著其功爲鐫經費於碑陰以旌善士凡會典所載應建之殿閣廊廡庭堂祠沼於舊制闕者增之廢者興之隘者廣之殘敗者葺而新之輪乎奐哉廷燮不敏陪奉邑之

靖安縣志

卷之十三

藝文

五十三

師儒躬率其父老子弟瞻拜乎

聖人之居講明其修道之教以仰副

聖天子祖述堯舜牖民向學之盛心而疏而記之於石而修身踐形窮經致用之士其益知所先務矣

重修縣學宮門記

馬廷燮

大成殿東南隅舊有門三楹爲學宮出入之所必經歷年旣久與

文廟漸就傾頽余癸亥夏來涖茲土嘗諮於學博李君臨川欲諏日而修葺之者數矣時下車伊始簿書叢集志焉未逮戊辰春奉檄重來六七年間益覺欹仄不支爰進邑紳士而

謀焉衆謀僉同欣欣然趨功恐後熊生文炳光輝昆季不惜出己力獨重建是門趾仍其舊楹壁則鳩工庀材一撤而新之朱棟雕檐於是門宇遂煥然改觀矣夫門者所以衛堂防閑出入作廟作室胥於此先焉故良爲門闕况斯門也瞻美富者於斯希賢聖者於斯安可視其就傾而不之顧耶是役也經始於己巳陽月之朔凡六閱月而功竣余深喜其兄若弟不肯因人成事又能殷殷樂善不倦且有以匡余數年未逮之志也因併取日月而誌之至木石瓦甓丹漆之費有簿焉不具述是爲記

修土門至沙河路記

署知縣 胡世墉

靖安縣志

卷之十三

藝文

五十四

嘉慶甲戌仲春予涖靖甫越月方問俗於棠棣都由縣西取渡沙河歷水口邨始進土門見所稱桃源者果深邃軒豁兼擅其勝儼然別一洞天也顧自沙河渡至土門十餘里許越陌度阡中多崎嶇仄徑遇天雨爛道尤踐淖不可行擔夫輿子彳亍惴惴惟傾跌水田是戒往來者苦之予思道路爲王政所關以時平治有司之責也會當捐廉以爲倡又私念桃源乃二劉故里鄉名孝悌俗尙敦睦豈遂無好行其德之人早圖及此抑或有志而未逮乎是歲十一月復因公過其地則履道坦坦忽若改觀向慮崎嶇仄徑者固已康莊足樂矣詢之里老謂是桃源人士醵金修治而亦賴水口有田近路

之家肯損田以益路始克成斯舉也予曰於戲君子觀於鄉而知王道之易易也詎不信乎風俗之偷也類由於各私其力而不知以公善爲心雖同井而秦越矣夫桃源與水口異鄉也今二鄉之人乃能不分畛域有力者捐錢有田者讓畔以共成此千萬人來往之坦途路雖一端也卽是而推之舉凡鄉里敦睦任卹之事胥可以勸矣明經漆占泰等來請予記故樂書此俾以告二鄉之人計路長十有五里廣約五尺兩旁均砌石中伐石蓋面其工費若干及樂輸首事姓名別泐諸碑至老山下石橋已據水口鄉修砌另有記茲不贅焉

新建

靖安縣志

卷之十三

藝文

五十五

上諭亭記

知縣

張國鈞

靖安自南唐改場爲縣分建昌武甯奉新三縣地領五鄉二十八都明嘉靖間知縣趙公輔因土城改甃磚石其間學校祠宇公廡代有增修建置頗備而於慶賀習儀典禮迄無定所相沿擇地行之嘉慶丁丑國鈞來知縣事朔望宣講

聖訓及恭逢

朝慶大典敬詣公所設香案望

闕行禮幸無隕越殊廩廩焉欽惟我

國家累洽重熙化成久道山陬海澨沐浴涵濡

上諭廣訓十六條括千百年至德要道之歸垂億萬年長治久

宏之策上自朝士大夫以下及乎鄉黨里巷村氓婦孺之細莫不範以身心淑其言行固已昭如日月之經天江河之行地矣靖安小邑也以十室之忠信計之邑小而士習得其正民風守其淳唐宋以來理學名臣時相輩出矧際承平休養生息四境胥臻上理尹斯邑者烏可不與之摩漸仁義以期被潤澤而大豐美哉嘉慶二十五年八月今天子登極之初錫類推仁

覃恩屢下國鈞率僚屬及諸紳耆等如舊行禮惶悚愈不自安退而謀諸同寅及邑之士大夫無不感激懽欣踴躍從事謹就舊書院基址恭建

靖安縣志

卷之十三

藝文

五十六

上諭亭一座正中敬設

萬壽龍牌周以崇垣飭以丹堊門內列東西兩廊房爲更衣之所鳩工庀材閱一載而告竣以視向之灑掃將事者今則崇宏巍煥快瞻雲就日之誠焉向之奔走不遑者今則贊拜雍容肅鞠躬屏息之神焉非敢謂敬事後食云爾也所願與五鄉二十八都人士究心於孝弟之道以仰副聖朝教育之宏是則守土者之幸也乎

靖邑環城石路記

舒夢蘭

設使有人媚權相築沙隄耗金萬鎰又或有人與石崇角富製錦步障五十里此二人者一無恥一暴殄作孽適以爲人

心風俗之蠹薦紳先生羞言之曾不若十室忠信之士造一梁培一徑以濟彼病涉塗足之人爲有德而可風也吾家居靖安西城外憶自十七歲歸自玉關始僑寓豫章城南每有事渡江而西還故鄉多以夜至必由東迤北環城而走雨後輒泥塗沒脛余坐輿中惕惕然若將陷也如是者三十年一旦雨中歸方憂是險則見環邑城石路四達如砥如矢輿者競相稱頌曰此舒敬修太翁一人之力所經營也併緬述某橋某堰咸賴翁樂助而成余心義焉翁諱丙杜族最長於夢蘭爲曾大父行翁之長孫婦涂氏吾出也故與其小郎澶之有過從之舊澶之好學而仁於其祖述其父叔從兄之命屬

靖安縣志

卷之十三

藝文

五十七

余作靖邑環城石路記余喟然曰翁之職不過半刺恒產亦不過萬金而志在濟人好行其德至考終之歲猶創此正直坦途爲勞者百年之利其視古庸庸伴食覲然日行於沙隄之上與夫恃恃入之財逞僭侈之慾之無善狀而不知恥者詎可與澶之之祖同年語哉石路基深七尺濶十尺內外以隍爲度自東而南千十尺南而西千三百尺東而口千七百五十尺北而西千二十尺創始於嘉慶乙丑歲四月朔日畢工於丙寅之夏其費傭力以萬計金以千計至行於此路之人恆河沙數彼其足之所履意之所許以蘄食報於翁子孫者環轉無盡又未可以道里計矣翁之長嗣森季嗣彬孫鳳

鳴致堯俱樂善不倦能繼先志者也例得併書

熊南浦捐助學田記

教諭 廖中孚

教職一官古所謂文學掾也佐守令以裨宣教化秩雖卑責固重矣而世顧視爲冷官才智之士往往不樂居之其居者亦或縈情升斗非有講道迪德之宏規於是乎師範不尊而素餐致誚矣中孚自束髮受書不敢以溫飽爲念嘉慶丁丑以縣令挑發楚北自分才性迂疏於吏事有所不習乃改就教職選得靖安學諭靖固瘠土歲除俸薪外舊有學租數十石第折以青蚨其值不過三之一兩學公之不足備三月之糧盤餐苜蓿况味蕭然予固求而得之亦俯仰之自適也歲

靖安縣志

卷之十三

藝文

五十八

癸未冬月邑紳熊君南浦慨然捐田二十餘畝歸儒學以助膏火時方纂修邑乘予旣與西齋黃公子城移牒於縣具載志中因重念學校爲育才之地士習之邪正人文之盛衰繫爲師者是賴而或不免以身家內顧之慮紛擾其神明則欲其從容坐論以講明聖賢之絕學與諸生砥礪夫廉隅將必有所不遑是則熊君學田之置其有裨於吾學者豈淺鮮乎熊君名文炳字遇伯南浦其號由布政司理問職加級授奉直大夫父祖以上皆好善蓋其詒謀有自云

補遺

宋

選佛堂記

知洪
張商英
新津人

崇甯天子賜馬祖塔號慈應諡曰祖印歲度一牒以奉香火住山老福深卽于祖殿後建天書閣承閣爲堂以選佛名之使其徒請記于余余三辭而請益堅余謂之曰古人謂選佛而及第者涉乎名言耳子以名堂余又記之無乃不可乎憐子之勤漫爲之記夫選佛者選擇之謂也有去有取有優有劣施之於科舉用之於人才此先王之所以厲世磨鈍之具非所謂選也使佛而可選也取六根乎取六塵乎取六識乎取三六則一切凡夫皆可作佛去三六則無量佛法誰修誰證取四諦六度七覺八正九定十無畏乃至十八不共法三

靖安縣志

卷之十三

藝文

五十九

十七助道法乎去之則無法也去取有無渺然如水之流於心腹歛然如埃之入於胸次此在修多羅藏或謂之二障或謂之不了意或謂之戲論或謂之徧計邪見或謂之微細流注取之非佛也去之非佛也不去不取亦非佛也果可選乎曰先生之論相宗也吾宗之論禪宗也凡與選者心空而已矣弟子造堂而有問宗師踞坐而有答或示之以元要或示之以料揀或示之以法鏡三昧或示之以道眼因緣或示之以向上一路或示之以末後一句或示之以當頭或示之以平實或揚眉瞬目或舉拂敲牀或畫圓相或畫一劃或拍手或作舞契吾機者知其心之空也知其心之空則佛果可選

矣余曰世尊舉花迦葉微笑正法眼藏如斯而已後世宗師之所指何紛紛之多乎吾恐釋氏之教衰於此矣深河東人也甘粗糲耐苦心久從關西眞淨遊孤硬卓立必能宏其道蓋釋氏之教枯槁以遺其形寂滅以灰其慮戒定密行鬼神所莫窺慈悲妙用幽顯所共仰迫而後應則五衆喪其伴侶不得已而後言則六聚忘其畛域生死之變人之所畏也吾未嘗有生安得有死則奚畏之利害之境人所擇之吾未嘗有利安得有害則奚擇之爲夫如是則不空於外而內自空不空於境而心自空不空於事而理自空不空於相而性自空不空於空而空自空空則等等則大大則圓圓則妙妙則

靖安縣志

卷之十三

藝文

六十

佛嗟乎吾以此望子子尙無忽哉

國朝

重修寶峯寺記

傅修

寶峯在靖安縣之西北去城四十里而遙唐貞元中禪師馬祖示寂於此山茶毘之時舍利無數其徒奉而藏於珠峯之下遂稱寶峯云初師之說法於鍾陵開元寺也學人雲集入室弟子至百有三十九人然皆不在寶峯寶峯所由盛則自師登建昌石門山顧而樂之屬侍者歸骨卒成塔識其曰建昌石門山者卽靖安寶峯也唐輿地志云爾自時厥後屏障頓開琳宮聳立尊者老宿主席嗣興不能悉數且而石門數

十里之內盡罩袈裟別院精藍拱翼環衛雖劫灰屢歷而此峯巋然其有精靈者存歟山子和尚往自會城掃舊老之遺墟攬龍門之獨秀於是蒐討形勝考核師承乃至筇枝碣石亦遡因緣尺地寸田必求版籍既已綜輯爲書勒成山志馳書徵記可謂開山哲匠矣自佛法入中國天下名山強半皆僧彌之所依據學士大夫常引以爲恨藉令以朝市易山林其果能如釋氏之志勤而守專不受纏徽不生退轉長有此而弗失乎作寶峯記蓋不禁其搦管而三歎也

以上舊志

碑記

明

靖安縣志

卷之十三

藝文

六十一

辟疆館記

况鍾

晉顧氏辟疆園者卽郡治東隅和豐坊五顯王廟地其故址也至元吳地記以五顯廟爲辟疆故地據景定姑胥志和豐坊有顧况宅唐大厯中拓府治規其半爲廐云云予於正統三年以五顯王靈異三禱旱潦皆應請於朝爲重興楹桷落成後甃井得斷石爲辟疆東晉字予友蹇叔真攷之則正顧况詩所謂辟疆東晉日竹樹有名園年代更多主池塘復裔孫爲辟疆顧氏園無疑也是歲冬予丁先太夫人之憂輔臣命禮部將以予奪情視事予哀號衰絰以郡事委郡丞邵諶而以五顯廟之南偏爲居廬終制焉六年予再視府事其

時官田賦額驛政綱運皆粗有成則每日晏暇休愛此館青葱蒼靄竹木明瑟爲簿書蕭閒地或賓客論政事亦時爲小詩參吾幕者爲蹇君仁譚君有章皆通才也予初以呂蹇兩尙書薦備官禮部出守雄劇治此旣久耽而樂之於是譚君爲製辟彊館字顏予臥室百年之後予幸不獲罪吳民沒我馬齒則咫尺山池亦安知非石相栖神之泊宅歟是爲記

峕

正統六年冬十一月二十有一日知直隸蘇州府事前禮部儀制司郎中靖安況鍾伯律氏書

案況伯律前後治蘇十三載奏牘甚多海剛峯所稱爲

靖安縣志

卷之十三

藝文

六十二

勝作十年救時宰相也前志僅登建言一疏全集不易得讀者每以爲憾茲擇其農田水利禮制義役諸疏有關於興革之大者載錄數篇俾知德惟善政自有本原後有循良堪爲治譜論者謂伯律政蹟彪炳皆由於獲上得時其實任蘇之始雖賜璽乘傳誅猾劾貪令行法立靡不稱神明而請減浮糧拋荒積欠以及漕連抽船諸大事一再抗疏而皆格於部議俱未允行至丁憂去甚有撫民侍郎成均陰嫉民人顧忠等誣以徇賄諸瑣事則上游之阻梗可知矣自非剛正之氣有以懾之亦烏能始終不渝哉迨有旨令自陳疏甫入而七縣耆民

顧縈等三萬七千餘人乞巡按御史奏請奪情始得昭雪復任成均去代撫者爲侍郎周文襄乃克同心協謀事無掣肘是時宣廟御極勤政愛民又有首輔楊文貞左右之故所請輒報可而浮糧濫派征收運解等糧歲遂減百六十萬石矣至他政之令行如流水美善不勝書無非以正人心厚風俗爲本立事在耳目之前而用心在數十百年之後宜夫恩德入人之深至今垂五百年而民猶不忘也辟疆園記集中未載係嘉慶間蘇城西米巷大覺寺僧掘地所得石故完好光景常新雖世遠年湮或有疑其僞者然文雅潔而書骨亦秀健蘇人

靖安縣志

卷之十三

藝文

六十三

士咸寶之遂並補入以俟博考

况太守重修至德廟碑記

江蘇巡撫

周

忱吉水人

宣德五年秋七月禮部郎中况鍾伯律奉璽書來知蘇州視事之日吏以囚牘進見民之繫獄者千餘人尙爭務勝交相訐訟有經十餘歲未決者伯律姑置弗問越明日率郡之父老進謁於吳泰伯廟見其堂宇傾仆垣墉頽圯吏民奉祀弗虔乃喟然嘆曰民不見德宜乎刑之不清也是非郡守之先務乎卽日命工度材撤其舊而新之曰堂曰室曰門曰廡爲屋凡四十楹繚以周垣堅以甃甃不十日而告成復率父老潔牲醪祇祀於廟居人過客瞻望咨嗟於是獄之繫囚交相

愧悔曰泰伯以天下讓民無得而稱焉吾輩所爭僅錐刀之末耳何重貽郡侯之羞乎皆相與俯伏庭下自服其辜不數日而獄以空虛告予時奉命巡撫江南列郡至蘇州祇謁祠下父老以其事告且曰昔者狄梁公以冬官侍郎爲江南巡撫使毀吳楚淫祠千七百所而此廟則在所留而不毀者去今千有餘年得吾郡侯葺而新之巡撫之來又適當其時吳民觀感興起自今其無復爭競之風乎予乃登進其父老而告之曰方泰伯之奔吳也斷髮文身示不可立然荆蠻義之從而歸之千餘家遂端委以臨其民是欲辭富貴而富貴隨之及其後世夫差狃於必勝窮兵黷武破越困濟欲伯中土

靖安縣志

卷之十三

藝文

六十四

卒之國亡身戮妻子爲俘是欲求富強而失其富強矣然則吳地數千年之富庶由泰伯之三讓有以致之也其鬪爭之成風者亦由夫差之好勝有以啟之也爾民欲爲泰伯之讓乎欲效夫差之爭乎一則廟食萬世一則貽譏千載其得與失必有能辨之者孔子曰能以禮讓爲國乎何有此予與太守期望於吾民之意父老曰善請以是爲記遂書於麗牲之石使四方之來謁者咸有所觀感而興起焉豈獨蘇之民而已哉

國朝

重修城門記

知縣

張兼山

靖安自明正德間知縣萬公士賢命民築土城城內外有池四隅有門門上有樓嘉靖間知縣趙公輔因土城改甃磚石徙南門於縣治前遷東門於卯方石甕層樓險固足恃萬厯間知縣鄭公煦再建改南門於西南隅改東門於東南隅國朝康熙七年知縣任公嘉瑞復遷南門如舊址遷東門於城隍廟側逮雍正元年知縣黃公天球復改南門於西南隅改東門於東南隅其所以或復或改當時固各有見要之以洽乎民心者爲得宜也道光七年閏五月余攝縣篆下車後邑紳士來謁者咸曰靖之人同心協力庀材鳩工共輸金勉爲義舉 上諭亭文峯塏暨邑乘以次重修告成功焉惟城

靖安縣志

卷之十三

藝文

六十五

垣歷數十年來風雨剝蝕多所損壞不有以補葺之無以固金湯而肅觀瞻且曰舊南門在縣治前舊東門在城隍廟側衆議僉同欲復其舊不獨爲利益一邑且文教亦有賴焉余嘉其樂善之無已也先是志塔事竣尙有未收捐項約計數百金及所剩木料磚物諸首事存記井然請概歸城用余捐廉重倡復得邑例貢生劉君錫杰體乃父誥授奉直大夫國任之遺志好義急公慨輸錢叁伯千以爲之助於是闔邑慕義者各隨力續捐又集三千餘緡乃克以次完繕告厥成功在局董事者皆銳意經理終始不懈於事城樓改建落成余登而望之粉堞百雉氣象新矣高樓宏敞耳自曠矣水木清

華亭相掩映學宮文昌宮相連屬煙嵐丹碧並列窗牖信乎巨觀或亦有補於文教也門舊有名南曰文明東曰紫陽余重書之以顏其額竊以政平訟理爲

國保障司牧者之責也尹是邑者果能因勢利導凡事務求洽乎民心庶幾無負守土之義也夫旣以自勗復記之以告來者

重修城記

知縣 宋慶賞

靖安城門自有明以迄我

朝屢經遷徙至道光丁亥前署任大梁張公同邑紳士重加修葺改建南門於縣治前竝改東門於城隍廟側仍前任任

靖安縣志

卷之十三

藝文

六十六

公嘉瑞所立舊址也戊子夏余承乏茲邑登而觀之規模宏敞氣象崢嶸信足以固金湯而防奸醜開偉觀而畀文教豈惟此邦人士之幸余不佞實有賴焉其它材鳩工凡木石磚瓦各若干用錢數千緡皆邑人所踴躍樂輸者余於是嘆張公之洽乎民而嘉在局董事者之勇于襄事也工旣竣邑人擬將司牧及捐助首事姓名壽諸梨棗謬列余名於張公後余唯茲役也余實未膺董督之責未便攬越邑人固請不已因綴數言於簡末俾後之宰斯土者知邑人之樂善好義協力同心而司牧者之貴於得民以因時起事也

重修新關帝廟碑記

知縣 林漢喬

道光十七年春予奉大府檄攝篆靖安每月朔望恭謁文廟畢卽詣關帝廟文昌宮各所行香往返一里許遠眺城外諸峯蒼翠欲滴俯瞰大澤池畫閣疎櫺暉映水光山色之間蔚然秀麗池迤北則關帝廟在焉廟有二所其建於明洪武二十八年者今謂之古關帝廟今廟在古廟前建於國朝雍正三年重修於乾隆五十八年閱今四十有五年矣廟漸傾圯神像剝落頓失舊觀廟僧如歡以復修請或謂塑像非古宜易木主且經久遠顧此事

朝廷祀典所關非吏民所得擅易也文廟之撤像設主始自前明嘉靖議本於宋文憲而定於夏文愍張文忠

靖安縣志

卷之十三

藝文

六十七

國朝酌古準今仍沿明制故各省巒宮咸遵京師定式至於歷代神廟自秦以後率多用像史志而外亦時時見於他說如樊舞陽侯像見於歐陽樊侯廟災記吳越王像見於東披表忠觀碑而金陵雞籠山之功臣廟塑像二十一人則仿麟閣雲臺遺意其他忠孝義烈及有功德於民立廟設像者未易更僕數然或祀於其鄉或祀於其建勲效節之地往往經數十百年其廟旣爲廢址頽垣其像亦委諸蔓草荒煙而不可復識蓋傳久之難如此伏惟關帝廟像自通邑大都暨於山陬海筵僻壤窮鄉人無不服其教而畏其神沒後至今千六百餘年享祀勿替而禮秩愈隆

國朝屢荷靈佑

勅封帝號天下郡縣關聖帝君殿與文昌帝君宮並建有司
春秋致祭日用上戊祭儀陳設一如上丁道光七年大兵平
定西域靈威丕顯渠魁就擒

天子特加褒錫用答神庥典至渥也夫敬奉

國家祀典以肅民志朔望春秋趨蹌瞻拜長吏之禮也重明
裡修廢墜不至因陋就簡以貽神羞則邑士民之事也爰命
如歡出簿勸輸毋廢前舉曾不踰時急公者響應雲集經始
於七月之既望工竣於十月之初旬丹堊建新金碧交錯予
喜其葺事之速也記諸碑以勵來者若夫關聖之大忠壯節

靖安縣志

卷之十三

藝文

六十八

久已彪炳史冊與日月爭光毋庸後學詞贊茲不復贅

重修黃茅嶺智頂茶庵記

知縣

林漢喬

黃茅嶺智頂古刹者舊名黃茅庵昔人因施茶而建也考之
縣志康熙二十六年建茶亭於山坳三十一年建庵亭側四
十八年置田地以贍施茶之資迄今百有餘年亭宇既廢茅
庵僅存田租亦歸於他寺鄉之人蓋鮮有知施茶之事者矣
程君友松憫往迹之寢湮也傷行旅之多艱也慨然爲修復
之計既已清釐田租召僧施茶又以諗於余願力肩修築之
任余嘉程君好善之誠用心之勤因捐廉爲倡并爲序言勸
捐卽屬君董其事程君於是不憚勞瘁遍告里人得捐輸錢

數百千爰於今春二月興工閱四月而工竣修復茶亭一所
添建庵屋十數椽禪堂佛像以次完整余爲顏其庵曰茶庵
紀實也靖邑西北多山而黃茅嶺特峙於雙溪之間崎嶇曲
折綿亘二十里爲礫坑塘埠諸鄉孔道而上達於武寧義寧
樵蘇負販行旅夥矣茶庵復而行者有息肩之所無煩渴之
虞所費不逾數百緡而利濟及千萬人之衆且使前人之美
不致泯沒而不彰程君於此謂非仁人君子之用心乎余自
往歲三月下車以來再度是嶺目擊山居之民踰越險阻往
來織途恒惻然念民生之艱今行且去矣是庵成而予心亦
少慰矣後之人誠有如程君者經紀其事時加修葺以惠及
於無窮是則行旅之幸亦卽余之所厚望也夫

靖安縣志

卷之十三

藝文

六十九

義倉記

舒化民

道光十五年太守張公以治九江有聲特移南昌首郡嚴明
振作百廢具興值洊饑之後慮八屬之民鮮蓋藏也倡興義
倉以厚儲積大府亟嘉許力肩其任風行雷動踰歲觀成建
倉於省城內之西北隅爲廩百九十六間貯穀六萬八千餘
石置田畝租息計紳民捐銀凡一十七萬有奇誠爲盛事靖
邑地瘠民貧遇省郡公事集費維艱而惟茲勸捐得銀錢壹
萬三千有奇義倉貯省會爲適中各屬有緩急原立時可請
撥用惟靖僻處山陬水道距省計程三百六十里而遙遇溪

水淺涸則舟膠無術挽行設當青黃不接時饑鴻嗷嗷待哺實有涸鮒之虞矣紳士呈於縣謂與其臨時請發有輾轉挽運之艱莫若先事預存得就近權宜之利請分穀五千石留貯於縣以備不虞縣上諸郡太守據情轉申而大府如詳批允靖邑之有義倉自茲始也然此舉在他州邑亦有請者皆未行而吾靖獨蒙俯允固

大府體念僻邑窮黎然非邑宰張公瀝情爲民請命太守剴切轉陳亦烏能及此哉張公已量移豐邑卸篆而猶關懷舊治如此署宰陳公繼之得藉手以速其成洵棠陰之堪繫去思者已十六年建倉廩於城中法藥寺東穀乃全數收倉二

靖安縣志

卷之十三

藝文

七十

十年歲稍歉畧平價值以陳易新而穀益乾潔閱今歲又□邑宰祁公倡議平糶詳請以義倉穀盡數碾米益以官紳所捐之錢穀濟之乃綽有餘裕矣六月糶事甫竣早稻登場價亦減秋成稍豐卽可及時買補如額倘此後經理得宜擴而充之縱豐歉不齊不已有備無患哉昔蘇文忠公自謂在浙二年親行荒政只用出糶常平米一事更不施行餘策官司簡便不勞給納煩費但將數萬石斛斗在市自然壓下物價境內百姓人人受賜今之常平固非昔之常平比也然以義倉之穀變通伉行亦何爲而不可哉倉建已數年逮修考棚而移廩於迤東爽塏堅固規模益寬敞矣太守張公名寅桐

城人邑宰張公名師吉宛平人署宰陳公名芝齡開化人今邑宰祁公名啟萼長洲人其當日捐資姓名及勸捐董事出力者俱著賢勞例得補書泐石

重修學宮記

知縣 祁啟萼

靖邑學宮重修蓋六年矣歲丁未予量移調茲邑謁祀講學喜其新也詢知爲紳民集資撤舊而更新之自宋紹興立學明萬曆移基修建凡廿餘次

國朝嘉慶十四年富紳重修後閱卅餘載不免頽朽及是鳩工址仍其舊材易其良遂巍然改觀并以餘貲葺城垣創校士館前令佛公舉以詳長吏咨大部凡董事勞及輸費多者

靖安縣志

卷之十三

藝文

七十一

例皆得優叙前令與有榮焉予乃嘆邑人之好義舉也僻處山鄉屢有興修蠲金不吝而於文教尤汲汲加意所爲觀感而振興者不先得本原哉風俗淳士習飭睹廟貌而知其易爲治也更願淳者加飭因其已新者而益新之民愈作其自新士彌日新其德泮壁薰陶文光燦燿雙溪繡谷川媚山輝常與宮牆競相煥發守茲土者不逾喜其生色乎是所以增新者不僅棟宇之輪奐矣予不敏兢兢以污舊是懼敢謂有善政得財善教得心更藉舉工要譽與下車伊始新意猶未達於民紳士輩以功竣旣久碑記尙懸爲請因諭以鄙意而記之邑之先達鄉大夫諒更有以勗我

重修城垣記

知縣 祁啟萼

靖之初建邑也原有城歲久圯廢明正德間始築土城嘉靖間易以甃嗣是疊次修改迄

國朝嘉慶年間已六修矣已而漸多坍塌

今上御極二十有一年闔邑紳民議修學宮建考棚并及城工於是勤畚插築墊塌補雉堞不數月而工竣予初視邑事閱城垣雖新舊相間而鞏固如一非尋常補苴也學宮考棚二十二年工已蕝以餘力及城予詢學宮事兼得其詳諸紳亦勤且勞矣竊謂費不集則工不能興費集矣而經理不得人則費虛糜而工亦不固他邑非無義舉絀於力艱於得人

靖安縣志

卷之十三

藝文

七十二

輒中弛者往往然矣靖雖蕞爾費則餘裕人則可任三工迭舉歷年既多董其事者豈易能哉予於閱學宮而知靖之有人也况乎城之累修皆因時之有警今幸生

太平之日正修文偃武之時而乃整飭垣墉屹屹言言固昭盛世富有之氣象亦未始非未雨之綢繆也凡學校城工例得動支帑項乃邑人自爲之踴躍趨公不煩

國費亦足見衆志之成城其秉公盡心量力輸財者榮膺優獎也宜哉予因紳士請補記學宮並補記城工焉

創建考棚記

知縣 祁啟萼

國家之試士也先自縣試之送於府府試之送於院院有校

士之宇標號而各使就座無紛無擾士子得以盡一日之長而稽察亦易郡邑多仿而創之靖安初未逮也縣試設席棚於署廊自攜几案雨露風日莫能避士多苦之道光二十一年邑紳重修學宮卽議倡建試宇乃卜地於明倫堂迤北新築義倉處移倉於東而創之中爲翹秀堂南向乃點名給卷之所前爲尊經閣遺址改作二門仍舊額焉兩旁爲吏舍又前爲頭門外設屏牆及左右閤西鄰法藥寺隔以垣堂後爲內門曲屋數楹爲試官燕息所西轉爲試宇總門內宇南□兩進東向一進各列坐號其西卽雙溪書院也有門巷相通試日扃焉庭軒厨溷皆具地遠囂塵布置軒豁不啻淨几明

靖安縣志

卷之十三

藝文

七十三

窻足以煥發文思亦足以肅

功令而謹關防處學宮書院之間尤爲士子所便習而樂遊進諸院試將諳嫻而整暇再進諸桂苑杏林亦同此發軔之梯階矣與學宮先後興工先後蒞事然後以餘力修城竊惟事莫難於創莫善於因學宮與城因也試宇則創焉學宮雖因亦若創焉衆紳不辭其難而皆底於成於戲善已夫城護民者也學校造士者也邑之人早自培之有司有觸而施政教宜何如哉予旣補記學宮城垣因并記此

學宮考棚城垣三工並舉事閱三載錢費倍萬其重資倡捐者以監生議敘縣丞項茂春爲最董事始終勤勞則有

舉人大挑分發湖北知縣加一級蕭鴻銓按察司照磨加一級舒俊民八品銜加一級舒受南六品銜紀錄二次趙人偉捐輸董事則有八品銜加一級紀錄三次閔中鴻監生議敘八品銜加一級舒汝熾增生八品銜紀錄二次舒忱從九品議敘八品銜加一級加捐州同張官鏞勸捐董事則有舉人信豐縣教諭加一級劉先煥舉人就職教諭加一級舒懋熙拔貢生就職教諭加一級舒恭詒武舉人紀錄二次舒景棣生員議敘從九羅鳳翔等皆急公任事著有勞績例得並書其捐費列名另碑備錄

中港鄧家洲引河水灌田記

舒化民

靖安縣志

卷之十三

藝文

七十四

靖邑城西二十五里曰中港長河自新興而下南岍有田數百畝而中隔一洲欲引河水灌田必假道於洲洲爲鄧族祖業不讓則未可強爭也數百畝之田如病膈噎明明飲食在前而咽不得下農家計無復之道光初年有爭水釀訟事十數年案懸未結其中予亦有田十之一丙午回籍偶來此鄉悉其事明經鄧仁圃予素好也因過訪而語以利物和義之理仁圃悅聚其族人而告以讓德之可貴且事有益於公無損於己何憚而不爲於是鄧族竟慨然劃出洲地許引河以資灌溉矣而各莊有業之家咸歸美鄧族之能讓且曰彼旣以讓來我安可不以禮往爰釀錢二百四十緡酬之若各行

其心所安者鄧族仍立券約兩收之而事定矣予弟俊民於茲事頗任其勞謂前此紛爭而未得一旦歡欣鼓舞而相與有成誠快事也然慮必周於久後此修堤築堰保護善後更當何如宜有以記之予惟天下事爭則兩害讓則兩利爭故明知已無所害而自不欲予人以利讓則人受利者亦必以利報非自然之理乎此風旣倡將見他鄉之義舉有類是者並可觀感而興起未必非此一事肇其端也至堤堰保護惟在隨時審度其宜後之人恆無忘禮讓之美意焉可也於是乎書

丁未平糶記

祁啟萼

靖安縣志

卷之十三

藝文

七十五

丁未春予由吉水移宰靖安南下車聞數月苦旱分秧無水人心惶惶予卽潔誠致禱稍得雨澤而米價翔踴不下窮民病甚予亟擬辦平糶案查邑中義倉存穀僅五千石恐不敷用時觀察舒自庵先生居憂在籍予往詢事宜則曰舊冬由會城吳鎮購運穀若干石備之久矣勸捐開糶則有十一年之舊章在伉行而變通之可也予喜甚爰集城鄉紳士議勸捐且先捐廉爲倡諸紳士無不懽忻相從數日之間捐穀三千三百餘石錢三千二百餘緡開糶於四月二十七日至六月初六日停止斯時早稼將登而民氣亦漸蘇矣其定價設局出入錢穀事宜觀察記之甚詳惟予忝司此土見諸紳士

之好善勇爲情深任恤助予力所不逮安可無一言夫靖邑一畝爾區也處萬山中旣無廣土沃壤溝塘蓄洩之利又無水驛關津外通商賈所謂富室不過僅足衣食非有蓋藏之厚可以侈用而無慮者也乃聞向者學宮城垣考棚諸工鳩庀之費皆出自本地規模侔於大邑卽今平糶一役近城紳富輸將旣不日而集而距城遠者各鄉殷實家亦多聞風慕效量其力之所能自爲平糶以濟其族里非風俗淳厚人心茂美而好義者多何能若是孔子曰不患貧而患不安靖邑之風土人情可謂安矣平糶甫竣予白其事於郡太守嘉之令卽造捐糶名冊分給匾額用獎賢勞而紳士咸讓美不居

靖安縣志

卷之十三

藝文

七十六

謂救災恤患桑梓之誼應爾焉用獎爲固辭乃已予益歎諸君子之好善皆無所爲而爲尤不可及也嘗慨夫近世素封家積金錢市田宅扃鑰閉閤視鄉黨鄰里之因苦漠然不一動其心慳吝有甚於貧人者蓋重利私己寢以成風矣卽有所稱好行其德者或迫於時勢動於名譽又或以陰德應報之說始足破其自私自利之心求所謂無所爲而爲者未有也今觀靖安諸紳士皆務實不務名其度量之相越遠矣且也歲之豐凶不能預必臨事而圖之與先事而防之則有間茲於糶事告竣後際收成之稍稔卽以平糶之錢益以捐餘之費買補義倉如舊數信乎觀察之言曰有備無患人事可

補天事之窮守是說而行之豈非一邑之福哉予既與諸君子共成此舉又喜諸君子始終其事而勞不居功故爲之記

雜著

明

劉全乙先生考

舒孟華

靖安處豫章之西其地脈與奉新連而水勢則會馮水修水而東浸衍直下新建吳城口滙彭蠡湖故可合奉靖甯武安建而隸於古海昏者古人相其勢也海昏總萃爲建昌無疑而奉靖並隸之李唐初盛時並隸洪州者亦如之直至南唐保大十年始更新吳爲奉新升靖安場爲靖安縣其爲兄弟

靖安縣志

卷之十三

藝文

七十七

之國類然靖安人文以名著三代後者不數數見獨是詩苑中於開元天寶際與高達夫岑嘉州王龍標孟浩然張正言輩相爲唱和有劉全乙先生焉先生諱脊虛字全乙有五言古樂府一首古體詩五首近體三首排律五首淵永深厚超然上逼漢魏下薄六朝絕不與世之鍛鍊求工者同日語焉夫詩以多著而先生以寡詩以近著而先生以古鍾譚詩歸獨贊先生爲簡而不苟作者此也南昌郡乘爲先生立傳舉宏詞科累官崇文館校書郎與靖安鄉賢考據無訛近日汪伯玉胡元瑞諸公詳論唐人詩上自天子下逮庶人三教九流無不畢備乃列先生於令長類中云楊盈川劉夏縣之屬

蓋指初唐之楊炯與先生其著者也其他未著者難以枚舉而先生固始之以夏縣終之以金馬門不妨互舉素履以概其生平是元瑞詩編不可謂非先生功臣而郡乘之補遺也已第所不解者雜錄中載先生爲江東人類選唐詩先生與常建兩公並遺其爲何方人氏而建僅指之爲盱眙夫自古有以地重人亦有以人重地若先生者是以人重地者也先生於十四首詩之外又有逸句云歸夢如春水悠悠達故鄉又駐馬渡江處望鄉待歸舟一涉家思全什便落豈先生厭居父母鄉而不使之傳乎抑選詩者不欲葫蘆中有此而故刊敝其地也華素性癖願執鞭先生者久之而且未安邱

靖安縣志

卷之十三

藝文

七十八

壑長想江湖憶丙辰客白下舟泊江東門外夢先生同王元美李于鱗及先大夫儼然以前輩臨華作禮甚肅先生以手書一冊授之次日於三山街肆翻閱古書所謂河嶽英靈集者先生在焉隨檢殷璠贊先生詩情幽興遠思苦語竒忽有所得便驚眾聽自永明以返可傑立江表夫江表之言其非江東也明矣歸家復詳郡乘始知先生受知於洪州刺史吳競競方直少許可獨高先生改所居之里爲孝悌鄉表異之孝悌鄉者固邑乘之棠棣都地名桃源者也逮後趙宋復有劉子虛字君實亦居孝悌鄉姓名頗相混然查詩藪併郡乘子虛又係宋乾道中與釋善權異中相交遊者夫子虛隱逸

之流與先生學業名位絕不相涉呂居仁圖西江詩派識者輕之何足望開元天寶之藩哉今盧郡守新誌載爲新吳人地分靖安夫靖安之不隸於新吳彰彰也先生所居之地則信屬靖安又可知也李卓吾曰太白總係海內人不必苦爭則江東之說豈非以王校書宿京口期先生不至而云然乎然京口又未必非先生之客遊也卽如常建有西山詩云我亦謝時去西山鸞鶴羣遂可指爲厭原山下人而借之以重豫章耶李頎送劉四赴夏縣古風廬山遠隱士往來張長公孟浩然九日寄劉大詩龍沙豫章北九日掛帆過客中誰送酒棹裏自成歌則劉四或其行名而劉大爲長兄之稱耳李靖安縣志

卷之十三

藝文

七十九

詩屬劉又屬夏縣總爲脊虛無疑也只此二詩先生爲靖安一方之俎豆豈無據哉華也於闕疑慎言之下爲先生考正之

國朝

山川人物古今異同論

舒育元

古今山川有異乎曰無異也古今人物有異乎曰有異也夫有山川乃有人物山川旣無異人物胡有異也然則人物無異乎曰人物有異而非以山川異也何也人物開闢山川者也人物奠安山川者也人物流覽山川而令山川有色維繫山川而山川賴以不朽者也此人物之所以異也曰人物旣

有異則山川或因人物而異古今同不同未可知也試以靖安論之靖安古揚州之域自南唐置縣以來迄宋而元而明吏其土者若曹豳之堂開袞繡楊億之亭建清華巡其地者若李太守勒馬崖之碑洪諫議留溪亭之句以暨周黃趙蔡撫循於前衡俞萬葉牧愛於後其所爲標山川之勝而培人物之靈者不旣多哉爰考其山筆峰峙於南垂文章之象焉龍岡踞於西爲雲雨所出焉其東則白石凌霄上有巨人跡在意亦媧皇之所鍊餘者歟北則繡谷環屏白雲如髻曾南豐所爲賦清華者也若乃桃源春色名襲武陵鶴嶺晴嵐秀同巫峽雙峯則平叔有記雙林則公權有書以至石門寶蓮

靖安縣志

卷之十三

藝文

八十

祖師卓錫柳學士之碑張丞相之記皆班班可攷者又如諶峯葛嶺仙侶翱翔旌陽令之劔抱朴子之書至今尙傳云其川一南折而遶縣城一北環而滙安邑淵源本共歸宿仍同故其爲人物也問所謂道法紫陽衍理學於千年者則有舒參軍問所謂禮肅秩宗扶大綱於百世者則有李尙書問所謂名齊李杜蜚詩英於盛唐者則有劉校書問所謂績茂龔黃稱循良於前明者則有况太守其他潛隱釣湄若以嚴陵名灘者呂商老也孝弟化里若以鄭公名鄉者劉君實也抗疏請劔不避權貴如槐里令者范鬱州也遺愛刻碑不忘百姓如桐鄉吏者簡蒲圻也至若龍奪前標則有姚劉兩狀元

之迹鱸崇舊學則有舒涂兩進士之規孝子則有朱仁二陳伯宣陳恩舒棐之純烈女則有陳若英舒乞秀之異義夫則有李叔正之終身不娶胡可興之貧賤不移節婦則有夏氏投井之潔余氏奪刃之雄與夫舒門四節之同志况氏雙節之繼美自是而若仙若釋吸盡西江水者非馬祖乎得意北海書者非瘦權乎水不濡火不熱而遺骸至今存者非佑聖乎駕木華而三日不下留赤印而千年不墜以及雙虎跨於雲間羣豹環於石畔非懿真諶母文簫葛洪恢奇俶詭而不可測者乎若而人者非雄才大畧有開闢山川之氣卽豐功偉烈有奠安山川之功非大節正學清操碩德有以繫山川

靖安縣志

卷之十三

藝文

八十一

於不朽卽鴻章藻翰怪迹竒蹤有以覽山川而使生色也是非山川之爲異乃人物之自異也夫至人物能自爲異則所謂開闢者或爭巨靈童律之竒奠安者或奏蒼水元圭之蹟維繫者可以立底柱而鎮鼇極流覽者又將登泰山而窮河源矣區區靖安云乎哉

靖安形勝說

陳以珥

靖安古海昏地漢屬建昌南唐昇元中割建昌奉新武甯地合爲縣按圖索之羨門鄉卽建昌之西陲南義靖安長安三鄉卽奉新之西陲招賢鄉卽武甯之東南區其建縣也當日有心者亦熟計焉蓋南條諸山本於衡岳自西而降東折茅

竹山爲奉靖二邑之少祖西兌迢迢穿帳爲龍頭坳起白雲峯歷當歸湖經盆田聚石腦南行者鄒家坳結奉新縣治東南下者撲孤嶺燕子崖度石馬之修源峯奔狐尾嶺結爲縣治龍頭坳左背出者黃茅山洪屏結安義建昌縣治爲靖安之後障右背出者越王嶺以爲南面輔從朔南僅百里東西亦百二三十里而繡谷爲屏文筆爲案曹仙洞諸山如曬袍然以爲西峙火焰山吸盡南河之水遙應西山會歸巽位淑氣所鍾代有傳人曩時文筆峯登高山盡植松林鬱鬱葱葱職斯土者皆卓然有聲稱而人文日蔚萬曆末年樵採者衆全露山骨自是復遭兵火人文亦少遜於前矣栽培之功其

靖安縣志

卷之十三

藝文

八十二

可少乎礪坑逼近武甯雙坑哨舊設巡司弓兵誠爲良法大梓密邇建昌崇山峻嶺忠夏南源遠通甯境富仁都委源洞深通三十餘里今雖開闢皆靖險要之境也靖之名雙溪也北水自礪坑大梓象湖追里熊仙以達於桐城南水合忠夏南源富仁新興棠棣盆田石馬安福熊仙之水亦會於桐城又南河分一流由清湖遶縣南滙於馬草湖是亦名爲雙溪靖安山水之原委大畧如此

公牘

附

明

改建學宮議

知縣

應汝稼

南昌府靖安縣爲改易學宮以隆作養事萬曆三十二年十月初九日據通學廩增附生員錢宏輔舒光學錢裕國陳應唐漆光宸等連名具呈前事內稱竊惟人文興起仰藉恩培士類舊庸亦資地勝靖邑地形由西落脈行二里許卽結縣治其東首盡處乃爲學宮形勢旣苦卑薄城牆且復逼臨而學宮右臂正當龍脉來處又爲法藥寺僧所據古時院宇卑陋猶屬相安嗣後僧日富剏建巍峩實阨學宮兩截其脈人文由此視昔漸衰且三年之內學師捐館者四數載之間青衿告殞者多士類寒心久欲議改萬曆二十四年教官熊時中等將梵王截脈請改等情具狀院司道府批准彼時佛像

靖安縣志

卷之十三

藝文

八十三

輝煌殿閣崢嶸難以遽改今遇寸晷之祖龍銷百年之鹿苑佛像殿閣盡化灰燼實天憫斯文之會乃地靈當易之秋也更今聖殿蟻朽兩廡圯壞亟宜修葺呈乞轉建容迭相貿易以佛場改建學宮以學宮轉爲佛殿咫尺移易事勢甚便且右儒左釋百年之風化維新存釋興儒四境之人心允協至於工費諸生父兄情樂義舉未敢仰煩官帑俾人文可復於當年作養有賴於今日等情到縣據此隨該本縣參看得靖安縣城僅三里許城隍逼在東門女牆之下聖廟次之法藥寺又次之原昔創立學宮之意本欲挹雙溪之秀源迨今古溪壅塞之時反若爲二氏之介路蓋徹夜鼓鐘之聲非所以

安聖靈也盡日僧道之跡非所以安聖教也况有城之東門以洩學宮左龍之氣有寺之高樓以截學宮右臂之脈雖屬堪輿家渺茫之說而邇來文運日衰科甲日落亦無恠乎諸生之歸咎矣故其睥睨改遷覬覦易地諒非一日之積也茲乃適逢其機遂爾掉臂而起竊念在寺僧必將重建梵宇豎於故址豎於新基僅煩黃冠輩咫尺之移於計甚便在庠士業競重新學殿不煩官帑不斂民財咸自青衿家錙兩之助於議甚安猶慮事勢重大未敢輕試然人心向義業已捐金三百面白於官庭封貯於宦家督工者願矢心趨事受役者應計日就工且以學址而易寺基僧殿不毀巒序重新合當

靖安縣志

卷之十三

藝文

八十四

請易以振人文庶城隍祈穀之場與采藻之地兩無錯雜而僧舍傳燈之處與傳經之處了不混淆矣

建立兌倉議

應汝稼

南昌府靖安縣爲比例懇恩建立兌倉以甦重困以垂永利事萬曆二十三年六月二十八日據通縣經催里老者約孫熊胡黃秀仁胡永旺等具呈前事內稱靖安僻處崇嶺倍當凋困地距省垣幾經逆折而西行舟歷層灘始得推移而東注旣苦石嶮復艱沙澀仲冬運米於扁舟止容五六石而艱險萬狀正初併貯於大舫計程八九日而侵耗千端大船病於積歇小艇苦於鼠偷漕米正副八千繁費何啻八百守候

風濤朝夕未保勉就軍幫欲壑難填方開兌索淋尖踢斛既畫會轄無籌順風江師加灑倉之派水手逼漿米之需橫勒者不一而足虎嚇者無端而來稍忤則民無黨而軍有黨脅力以箠相鬪則軍擅水而民畏水束手待斃拚使苦運之糧買免一朝之禍未經交盤先花過半迨至弔籌鬻償莫及皆因無倉之故遂成胥溺之危近據建昌諸倉悉與奉進比例况靖復據三縣之上流輸挽倍什伯之苦楚倒懸莫解剥膚孰援幸遇台慈撫恤民艱遍除民害興革已無遺策士民共荷帡幪獨此兌倉尤爲隱痛特倣安義條例用敢披瀝具情三七甲捐貲修建費適當四八甲提承兌運役仍常分已

靖安縣志

卷之十三

藝文

八十五

買基于茅竹架地靈宏開勝之規計營繕于旦夕間人事切趨蹌之願伏念政有同仁靖非異屬一經申請上必喜其避危倘奉俯俞下永享乎樂利呈乞片言轉懇恩甦極困疲弊等情到縣又據通學廩增附生員錢裕國舒顯才陳應唐等呈同前事內稱竊惟極敝難仍更化乃治靖處僻隅水兌最苦是用集識合邑縉紳舒本立項潛陳舜德錢宏毅貢生陳應庚黎孔鳳龔作錢宏道項澄監生陳應慶等僉謂靖民水兌楚毒異常自小船以迄大船費使不貲侵漁莫測移民幫以就軍幫刁難任彼橫索無端尤所慘者風波守候幾與魚鱉爲羣旗甲臨船不啻虎狼搏噬前既憂乎漂溺後復困乎

侵牟血海難投兌倉曷已三甲願捐貲以修建不煩通邑之科四甲樂承役以運兌冀舒目前之苦卜基業有成圖營工祇俟不日茲幸台臺撫綏瘠邑百廢具興改學振文諸生已蒙造育而建倉除害萬民快覩更生屢沐軫憐未荷詳懇伏乞片語施仁永垂樂利等情到縣據此隨該本縣參看得靖安斗邑立于山澗之中淮糧數僅七八千雖非大儲而渾米必在九十月勢實多艱蓋緣小邑原無通流類由淺灘以達塗埠至冬月則有枯涸之虞細流難容巨艦類由小艇以達大船至省會則有守候之苦况大船戶俱係隔屬之民其需索倍于尋常一搬移必多侵竊之弊其損耗豈止升斗卽如

靖安縣志

卷之十三

藝文

八十六

春月之忽遭颶風雖倖逃及腹之災脫如今日計疎未雨奚免噬臍之悔若有倉在省則孟秋而徵孟秋而運卽由淺灘之行綽有餘矣以靖安船運靖安米歲省大船之費五百石矣縱有風濤不測之變而我立萬全之地卽有刁軍意外之索而我無狼戾之憂是水次倉誠萬民之所仰望而萬民之所利賴也但靖安頻歲凶荒十室九空幸今一二歲豐稔而舊逋新糧交相催併又比屋而出見米而課又似醫瘡剜肉是利未得而害隨之本縣躊躇不敢申請坐此之故今議以三甲建兌倉免其經催之費不足者以七甲之里長幫之約計六百餘兩聽民自選謹慎者總計出入完日冊報仍提四

甲八甲承當里役蓋四甲喜於得倉不辭早役而三甲喜於免役情願捐貲庶倉可速成而糧可速運下可以少甦民困而上可以無煩憲慮倉成之後應設倉夫二名看守其工食不便加派計本縣每年簽批頭八名運糧令批頭每名出銀壹兩每年計八兩以七兩爲看省倉工食以一兩爲修倉支費既不擾於民間又不虞其圯壞矣

糧米改行官解議

應汝稼

南昌府靖安縣爲比例官解糧米以完國課以甦民困事查得吉安府廬陵等縣南北二糧俱係官收官解官民兩得其便已蒙前院行查又據合邑縉紳貢監生員耆老舒本立龔

靖安縣志

卷之十三

藝文

八十七

作陳應庚錢裕國陳應唐舒相七二舒禮二等合議俱各呈稱官解便益之甚仰祈上遵憲約下救民生卽賜詳請以俾士民蚤得沾惠等情到縣隨該本縣參看得靖安斗邑不及大縣閭伍之眾且萬山巖業除稻穀外並無富商巨賈貿易之利此地瘠民貧固其所也歲編南北二糧正副米約壹萬壹百零而每歲各簽批頭八名以糧多者兌南糧以次多者兌北糧小者則在經管收解法雖相沿第苦於積歇之包攬苛里之掊剋當簽點時非不以殷實者承役而居家守分者或不諳京省之務勢不得不假托于慣熟之人故其斂米於民家也爲斗斛而量之卽斗斛而加耗焉入私囊矣其兌米

於公家也爲幫貼以助之卽幫貼而侵漁焉匱公用矣故每
每王債京債累及有糧者破家蕩產如三十一年南米有黎
貞四者包攬黎志萬黃堯一等糧米致借債而歸反扳扯族
衆派償至今貞四見與王六三訐訟未了皆可鏡也蓋蕞爾
之邑歲以一糧官帶領批頭八人赴省赴京批頭一名其族
戚之幫助者最少者亦五六人人心不同如其面焉豈能一
一皆廉潔貞諒之徒勢一染指卽包攬者亦不能自顧矣更
兼六七十餘人同往其盤費虛耗豈止錙銖如十羊九牧弊
也何堪卑職到任頗知此弊有慨於中久矣於徵米之時減
從親比其糧官一應召保陋習俱行痛革然此不過於枝葉
靖安縣志

卷之十三

藝文

八十八

上用功而於根本處未究也今若立官解之法則包攬者無
所施其術侵取者無所乘其機不點批頭而當役者高枕無
憂惠在一歲矣不耗民米而赴納者將輸無患惠在一邑矣
所有條欵另行開列

國朝

重建會城水次漕倉碑

黃天球

會城之有水次倉也所以便兌漕也初靖邑省會無倉歲以
舟貯米江干水兌耗費多而有風濤之險明萬厯間臨海應
公汝稼以孝廉來宰靖始建水次倉於會城民懷其德而繪
像祀之按邑志倉在章江門外茅竹架下左餘千倉右民屋

前面江及上米坡後抵大街中建官樓一重甬道左右爲十廩貯米三千有奇又旁屋三間前後門外各有店地

國朝康熙七年知縣任公嘉瑞清界立石載明丈尺記諸碑志稱後街店地三間今止存其一而碑之亡久矣靖安漕額運省者正副米及耗贈米共八千三百石倉廩一十所貯米僅半二運率以先運者貯倉以續運者貯舟待貯倉者兌畢然後以在舟者運於倉以足兌旗丁有逼迫勒索之患米舟有久貯不測之憂康熙三十六年孟縣毛公鵬由翰林出爲靖令其明年買民地於樓右益置大廩七於是二運亦有倉可貯矣然尙千餘石無所容仍舟貯以待余以六十一年壬

靖安縣志

卷之十三

藝文

八十九

寅秋承乏茲邑嘗思擴之而未遑也雍正二年十月章門外火災靖倉盡燬於火本年漕米借貯浮梁倉出兌三年春集紳士里民議重建僉曰築室而道謀事用不集願各斂費輸諸官惟所裁用於是公議捐輸法一以里計一以糧計二十八里每里各先捐錢二十千又各準其糧之多寡而捐數有差者過半通計所捐錢共一千二百七十三千七百零費有出矣乃召匠人計屋論值自四月經始至八月訖工先建官樓四間次正廩十間次旁廩七間制皆如舊而廩之高廣有加八千三百石之漕額始足貯有餘矣樓上奉馬祖大師靖人謂從來渡江無水戾皆馬祖力故從其請也樓下右側建

土地祠一間前建大門一座廣其上米坡右建角門一座以通右街後造從屋三重四間而翼兩廊又臨街店樓一間地皆偏右四圍牆垣視舊制加高三尺餘計其工費木工統議銀四百五十七兩石工墁工銀三百九十五兩五錢油漆釘鐵諸色雜匠銀二十九兩督工日用倉中器物及裝錢運省諸雜費約銀四十八兩有零錢價準時值每千抵紋銀六錢八分給發通計所發錢共一千三百六十一千文除捐數給發外長用錢八十餘千則余捐俸所補也董其事者幕友倪子名錦字子厚鳩工庀材務精良完固爲靖人久遠計者倪子力也客有謂予曰茲記倉之重建而繁稱昔之爲倉者何

靖安縣志

卷之十三

藝文

九十

居余曰夫事必詳其始末而後人知其所自來且不忘前人功亦使備識其先後創造之難而保守不可不慎也是役也輿情響應而民力亦已殫矣靖邑地瘠民貧可無念乎故於經費尤加詳焉抑余更有爲後人戒者倉門外官地毋許倉役造房以圖利倉初建而有徐大亨者強踞而造市房余詳請撤去臘月十二日對倉屋失火幾爲大憂幸附牆之屋已撤而獲免然則斯地之永宜空置以杜後災也審矣其戒之哉其慎之哉工旣竣勒碑石而爲之記併書丈尺於後

一倉前官地直柒丈叁尺前濶貳丈肆尺後濶貳丈壹尺
五寸

一官樓基深貳丈柒尺濶叁丈捌尺
一倉後從屋基直共玖丈貳尺前重濶壹丈肆尺中間濶壹丈玖尺後重壹丈
一傍廩基濶陸丈肆尺深叁丈陸尺
一牆前甬道及廩基濶柒丈壹尺伍寸直肆丈捌尺伍寸
一倉右牆外餘地長貳丈濶叁尺叁寸

革弊實紀

知縣

張叔琳

今上雍正六年十二月余奉

簡命承乏茲土甫下車卽詢民間利弊其累之大且久而未能除者則在里糧有偏枯之苦按靖邑二十八里其畝甲之靖安縣志

卷之十三

藝文

九十一

丁糧不均或多至於數百或少不上數十而一切条漕項下使費俱從里甲分歛以故丁糧少者磨貧徹骨余惻然憫之以爲際茲熙皞之世

聖天子仁心仁政浹洽光天之下各上憲宣德達情下飭屬員詳明懇切而忍令山城僻壤尙留此病民之大累實心奉行之謂何於是不俟顧慮於雍正八年秋具文詳請俾照正供輸納一切隨漕雜派悉革除之至於保甲有夫役薪草之派有按季結冊之錢祭祀有油鹽帛燭之供有豬羊半估之弊其他各項陋規雖屬細微無不逐一禁止要不忍以額外者爲民病奉行至今五年業詳憲立石於縣堂之側矣今者

予以病告解組邑父老有歔歔泣下以爲積久弊生恐予之捐養廉以利民者未必能永久而勿替也余之積焦勞於五六年者未必不更復於一旦也更願得予一言紀其事附諸縣志以告後來於戲余何言繡峯在望雙水長清行與諸父老別矣惟此六年來才不稱心智慮有所未周耳目有所不及敢自云無過哉而徑直以行知弊必革猶堪與父老共白也後來泣茲土者諒有同心念予之中廢當有憐予之拙而補予政之不逮者甯於病民之大者而反忽諸然而予懷倦倦曷其有極孔子云舊令尹之政必以告新令尹余又何嫌焉用將革弊條欵開列於左

靖安縣志

卷之十三

藝文

九十二

一靖邑条漕雨項舊例設立總催名色卽單頭里長之類催儻条漕二十八都每都丁糧均派飯食使費一二百兩不等到任後詳明各憲嚴行革除勒石永禁現豎堂側各都舉行義置每月自行輸納历年奏銷全完但禁革之後所有錢糧正項奏銷化寶起解夫役及經承工食紙張等件捐給養廉賠墊

一徵收錢糧舊例內扣每銀一兩給印串銀九錢到任卽令外扣每銀一兩給印串銀一兩外加耗羨銀一錢並無暗扣

一漕糧項下靖邑二十八都向例每都均派隨漕使費銀

七兩二錢又加一倍名曰幫漕卽窮丁無糧亦要派出并有浮耗米石以爲兌漕各項費用到任後徹底清查詳明盡行革除但三年以前所有兌漕及修倉鋪墊經承飯食紙張等項亦屬養廉賠墊迨至上年奉憲核增耗米二百餘石方可抵辦

一漕米項下向來陋習每年例給縣丞米一百六十石浮面淋尖竟有二百餘石到任查明詳革

一縣徵收漕米舊例每石內扣扒夫挑夫脚米二升亦經詳明革除到任六年完糧總令糧戶自行執盪並無浮面一徵收稅銀舊例每兩納三分外油硃銀四釐到任卽行

靖安縣志

卷之十三

藝文

九十三

禁革諭令業戶遵例納稅自封投櫃

一給發各役工食舊例每銀一兩給小錢一千文自到任後卽照額數足紋庫平當堂給發並無扣剋絲毫

一春秋祭祀給銀買備猪羊帛果等項舊例價短秤大苛派行戶更有各項陋規賠累使用自到任後俱照額銀當堂給發按依時價平秤親稱陋規盡革

一縣城內外保長舊例餽送時節規禮并典史及衙役等使用每年約有數百串小錢盡行革除至於山鄉交炭幾萬斤竹木柴草不計其數亦俱革盡無遺其夫役俱四城保長僱募備用今俱發現銀不許派累

一靖邑鄉市泥水木匠外縣人居多舊例本縣匠頭承值衙門每年串通衙役等需索幫帖工費銀兩到任後革除匠頭凡有需用自喚工匠現給工價

乾隆十九年詳定洋濠堰文案

南昌府奉新縣知縣署靖安縣知縣李爲頒恩提案禁攢靖志全賦斬頌事乾隆十八年三月初七日奉南昌府正堂董票開乾隆十八年二月十六日奉布政使司王牌開乾隆十八年二月二十二日奉巡撫部院鄂批據靖安縣監生潛曰寰生員胡廷對等具呈前事詞稱緣生靖邑洋濠堰開靖以來天然水道不勞開鑿禍因烏石潭口入水飛流洋濠苦生

靖安縣志

卷之十三

藝文

九十四

二都田地勢處高原於洋濠橫設橋木障水分蔭其橋上飛流下蔭奉田歷有餘裕今生靖遵例載志詎有奉棍余開佶等飄捏於明成化年間有奉民余鼎漢等開鑿字樣計攢靖志訟訐數載雖奉各憲批府妥議詳結賴奉棍蔽天局謀狡攢訟無了日今幸福臨江右生靖有奈切志以功載靖水既不勞開鑿奉民何功載志奉棍又捏云久載奉志今奉志現存府卷並無鑿修一字炳炳可查卽康熙三十五年因水搆訟勒有碑摹現存亦無志載鑿修之說且不惟碑摹縣志兩無可據卽府志省志更無隻字道及奉棍何據攢志况橋木尺寸生靖肅遵新頒部尺視古橋木已減四寸五分生靖既

不違法又不阻水奉棍何必攢志事關萬年水利二都國賦目前載志事輕日後害靖事重若不頒恩提准悞攢靖志日後必至去橋橋去蔭絕靖民何辜必遭逼竄爲此冒死泣告捨准提案電察飭詳禁攢靖志立案斬訟賦命兩賴萬代公卿等情奉批前據該司議詳烏石潭陂前明開鑿重修仍應照舊刊入志內今稱奉志碑摹俱無鑿修之說恐貽靖邑之害查地方水利務須辦理得宜仰布政司速飭南昌府秉公勘議詳奪等因計粘抄呈一紙到縣奉此隨於本年十二月十二日奉南昌府正堂朱親詣該處查勘得奉新縣監生余開佶等靖安縣監生潛曰寰等爭控水利一案緣靖安縣境

靖安縣志

卷之十三

藝文

九十五

內有水港一道歷來係奉靖兩邑附近之田共藉資灌向各相安至康熙三十五年兩邑民人爭水互控詳奉批定飭立橋木障水均分亦遵奉到今俱無異議乃因兩邑修輯志書奉新縣監生余開佶等執明志成化年間余鼎漢率民戶鑿開之烏石陂謂卽現設橋木處所欲將此說載入靖邑志內據靖安縣監生潛曰寰等以此處地名洋濠各有界限豎不相從訐訟不已奉憲台檄飭勘議等因前府董守未經往勘旋即奉調卑府抵任後於本月十二日親往逐加細勘該處自西往東有大河一道河之西有黑色巨石數塊週圍水勢潺湲此卽所謂烏石潭陂其地較高遠近層巒環繞若山水

一發皆直注於此烏石北首另有小港港之上有木橋橋之前二里許向南有圳田土咸藉分引港水以潤再前則係設橋之處由此而下曲折凡數里皆係靖安縣所轄自此以東方接奉新縣界其港內之水悉從烏石潭分流水大則有大河承受水小則此港亦所不竭據奉民開鑿之說並無痕蹟可尋以現在形勢而論兩邑田疇關係在此橋木者不小非但須永遠設立並不可使上下稍有那移蓋該地高下縣殊若無關欄則勢同建瓴必致一瀉無遺所以當日於此建立橋木俾上有所蓄下有所資利得普沾誠良法也今請仍其舊制照依前議橋木圍圓定以三尺三寸長二丈六尺四寸

靖安縣志

卷之十三

藝文

九十六

松椿二十四個卽於橋木傍勒碑蓋亭以垂永久其松椿半多朽壞卑府親爲重定一十三根至二比各執其說固事遠年湮莫可稽考但俱無關水利緊要縱開闢是實斷不能動此橋木分寸如以爲非亦不容稍有增添并請不必入於志乘設欲刊刻亦各聽載本邑志內總不許傍及混淆從前兩縣各子其民致漫無定斷卑府無所偏倚其間惟期兩處均平訟端永絕以仰副憲台息訟甯人之德意緣奉勘議事理是否允協理合繪圖貼說填用預印空白文冊詳請憲台核轉等由詳奉布政使司王批仰候核轉繳碑摹圖稟存等因批詳到府奉此隨於乾隆十九年二月二十五日奉本府粘

詳飭縣奉此隨奉藩憲核詳查得靖安縣境內有烏石潭陂一道其地高阜山水匯注之區也迤邐而下越二里許名曰洋濠水分南北兩圳南蔭靖田北蔭奉田奉靖兩邑田疇均資灌溉康熙三十五年因兩邑民人爭水互控詳奉批定於洋濠處所設立橋木障水均分並無偏枯迄今五十餘載兩邑水利適均彼此相安無事嗣因纂修志乘監生余開佶潛曰寰等藉因修志復行興訟經府委據奉靖二縣會同勘明現在橋木圍圓三尺三寸身長二丈六尺四寸上下松椿二十四個請照現在丈尺數目刊載兩邑志內等情業於乾隆十六年經本司核議應卽以現在三尺三寸以部尺量驗之

靖安縣志

卷之十三

藝文

九十七

橋木爲額定準繩詳奉前憲批定飭令各入縣志永杜爭端餘俱畫一刊載等因各在案乃奉新縣監生余開佶等以烏石潭水利係奉民余鼎漢等開鑿希圖攢人靖志致靖安縣監生潛曰寰等不甘以奉志碑摹俱無鑿修之說若悞攢靖志恐貽靖邑之害呈奉前憲批司速飭南昌府秉公勘議復據署靖安縣知縣孫百代稟呈洋濠水利節畧均奉批司一并飭府秉公勘議俱經轉行南昌府秉公勘議詳奪去後今據南昌府知府朱若炳親往查勘議詳前來本司覆查朱守勘詳極爲明晰核其形勢奉靖兩邑田疇關係在此橋木者不小非但須永遠設立并不可使上下稍有那移蓋地高下

懸殊若無關欄則勢同建瓴必致一瀉無遺所以當日於此建立橋木俾上有所蓄下有所資利得普沾誠良法也今朱守勘詳核之原案亦屬相符應如該府所請仍其舊制總以原設之橋木定爲準繩照依前議橋木圍圓定以三尺三寸長二丈六尺四寸松椿二十四個卽于橋木傍勒碑蓋亭以垂永久至奉民鑿修之說原無關於水利緊要縱使開闢是實亦應如府議斷不能動此橋木分寸如以爲非亦不容稍有增添惟該府所請不必入於志乘之處殊有未協地方水利原應備載志乘以昭徵信所有奉靖二縣水利於洋濠處所設立橋木分寸以及障水分蔭緣由應令兩縣知縣照此

靖安縣志

卷之十三

藝文

九十八

番詳定之案各載本邑志內不許傍及混淆并不許添減一字俾兩邑世守永杜爭端仍取碑摹志書送查是否允協理合詳候本護院鑒核批示飭遵等因詳奉護理巡撫印務布政使司王批本司詳覆奉靖二縣互爭洋濠水利一案奉批如詳飭遵仍取摹志送查繳等因批司抄看行府飭縣官吏查照抄看事理文到卽便遵奉憲檄內情節妥協查辦該縣將洋濠處所設立橋木分寸以及障水分蔭緣由照此番詳定之案各載本邑志內不許傍及混淆并不許添減一字仍卽取具碑摹四張志書四套具文飛馳送府以憑查核轉送毋得違延等因奉此除飭遵刊石碑備載外合遵刊刻志書

永遵定案須至誌者乾隆十九年四月某日遵刊奉新縣知縣署靖安縣事李秉鑑監生潛曰寰生員胡廷對生員胡廷勳堰民彭敬齋潛耀賓胡帝言晏遴選項良臣張兼善晏文炳項周尙潛靜山彭曰珅張士樞鄧士耀等奉行

公牘

請撥給義倉穀石分貯縣城詳文

南昌府爲據情詳請撥給義倉穀石以備平糶事據署靖安縣知縣陳芝齡詳稱據卑縣增生程衢監生舒受南舉人項守和職員張立誠監生舒俊民趙人偉等呈稱竊維積穀防饑乃可有備無患而撥穀平糶亦須預置得宜江西近年疊被水災戶鮮蓋藏彌形竭蹶仰蒙本府軫恤民艱爲思患預防之計倡建義倉於省城適中處所頒示各邑諭令士民踴躍捐輸襄成義舉並已詳明

大憲批准事竣列單

奏請

恩施凡此諄諄獎勸不憚至再至三愷切真誠無非爲閭閻謀久遠計復蒙康濟同心奉行益力特遴董事赴鄉勸捐靖邑土瘠民貧不敢有辜德意勉力慕義共捐錢文至一萬三千有奇現已陸續呈繳一律解省買穀存倉伏思本府創此盛舉一視同仁各屬如有緩急原可立時稟請惟靖邑僻處

山陬距省水道計程三百六十里自吳城以西俱係山溪小河由安義萬家埠而上更屬灘高水淺帆檣無用篙力難施全賴船戶肩負以行一遇水涸每船僅能裝載十餘石日止挽行十數里運道之難視他邑爲最甚因思

堯湯水旱偏災所不能免設當嗷嗷待哺之時必待泛舟遠涉實有涸鮒之虞與其臨時請發有輾轉搬運之難莫若先事預存得就近權宜之利且聞省倉貯穀已在十萬以外卽稍分涓滴存貯外邑在省會不至短絀而於山城小邑則大有所裨益但使經理得宜貯縣與貯省無異是以公同酌議擬於本邑再行勸捐建倉請撥靖安鄉桶穀五千石存貯於

靖安縣志

卷之十三

藝文

一百

縣以備平糶而免臨時挽運維艱理合呈懇轉詳核示辦理等情到府據此卑府伏查靖安縣地處偏隅迥非他邑可比今該縣紳士請於勸捐義倉穀內撥給五千石存縣建倉收貯係屬因地制宜爲民食起見將來設遇荒歉平糶免再由府撥運之煩似可俯如所請辦理除飭速卽建倉報竣由卑府親詣勘驗再行照數撥給囤貯外合先據情轉詳 憲台俯賜核示飭遵

道光十六年七月二十六日具詳奉 藩憲李 批仰候據

情轉詳俟奉到 撫憲批示另檄飭遵此繳

撫憲陳 批如詳飭遵仍候督部堂批示繳